

金剛頂發菩提心論淺異釋

附金波羅華集

大德



上海图书馆藏书



A541 212 0021 7295B

朱麗莎

金剛頂發誓提心論淺異釋

附金波眾華集

老虛



余	心	識	務	言	興	致	懺
者	以	所	累	內	世	力	華
所	息	蓋	心	詮	之	講	先
能	緣	夜	業	者	學	求	生
堪	化	來	牘	迴	不	觀	至
六	緣	入	勞	殊	經	其	誠
七	而	夢	形	也	四	為	修
年	自	都	自	余	敘	學	釋
來	化	為	朝	於	行	途	氏
平	殆	紛	至	佛	不	徑	之
晚	非	紕	暮	學	依	頗	學
學	塵	世	盡	毫	四	有	而
作	勞	態	為	無	攝	似	於
念	中	之	外	門	而	於	密
佛	之	幻	物	徑	夢	法	法
持	愚	影	所	兼	夢	相	尤
呪	癡	欲	牽	以	然	家	特
雖	如	息	業	政	修	法	為

無	廣	自	海	妄	範	脫	在
登	博	縛	放	動	圍	也	車
涉	之	引	而	愈	於	良	塵
之	佛	石	不	多	是	由	馬
可	學	自	治	身	浪	幼	跡
能	大	壓	不	居	漫	小	之
亦	海	念	獨	國	性	離	中
未	崇	佛	自	政	成	父	未
嘗	高	之	害	之	業	師	嘗
作	危	意	亦	中	緣	之	間
此	峻	乃	以	樞	纏	教	斷
不	之	在	害	心	縛	誨	若
自	佛	於	人	馳	愈	長	此
度	道	此	誤	於	重	大	者
量	高	是	國	世	而	無	非
之	山	以	故	欲	心	規	為
謬	不	深	作	之	識	律	求
想	獨	測	繭	熱	之	之	解

修	謂	裂	諄	堪	中	文	也。
持	宗	戒	諄	涉	十	化	惟
之	門	法	以	念。	分	之	時
異。	者。	錫	告	夫	之	一	時
猶	僅	杖	戒	佛	八	大	引
之	由	斷	衆	法	九。	端。	以
今	長	而	門	之	而	中	為
日	老	金	徒	要。	教	國	己
政	大	鉢	者	惟	門	國	任
治	衆	破	僅	在	之	民。	者。
諍	地	五	此。	於	墮	信	則
論	位	部	自	戒	落	佛	宗
之	之	之	後	律。	腐	者	教
因	別。	分	諸	大	敗。	占	之
幹	而	以	宗	師	乃	全	事。
部	起	成。	並	涅	至	國	為
大	律	然	起	槃	於	人	國
衆	法	可	割	時。	不	口	民

有	為	再	聞	調	典	宗	而
所	維	數	問。	伏	既	之	起
為。	護	十	半	身	廢	源	分
在	國	年	月	心	而	僅	別
民	民	間	讀	建	不	由	也。
間	文	即	戒	立	讀	一	然
事	化	無	之	楷	世	師	自
業	計	異	制	模	學	所	佛
振	政	教	更	之	更	奉	法
興	府	之	無	戒	擯	經	入
教	於	壓	一	律	而	論	中
化	宗	迫	寺	則	不	之	國
著	教	佛	奉	束	治	別。	後
及	行	教	行。	之	釋	因	諸
秩	政	亦	如	高	迦	此	宗
序	不	將	此	閣	所	之	並
整	可	自	過	無	持	故	興
齊	不	滅。	去	人	以	佛	立

民	之	蓋	滅	之	侶	在	之
計	宗	宗	亡	結	指	萬	國
此	教	教	也。	果	導	事	施
事	如	閔	百	遂	除	萬	政
為	佛	係	政	成	惡	法	之
最	教	於	皆	今	興	頹	要
急	者	民	然	日	善	廢	在
也。	其	族	而	之	而	如	於
	腐	文	宗	腐	不	中	保
	敗	化	教	敗	能	國	障
	墜	者	行	再	純	者	民
	落	至	政	放	任	政	間
	最	大	之	任	其	府	之
	甚	而	建	之	自	之	自
	為	中	樹	是	由	責	由
	救	國	為	坐	蓋	在	發
	國	國	尤	視	自	於	展
	救	有	著。	其	由	提	而

者	宜	以	前	學	學	以	懺
之	急	為	途	者	家	論	華
研	起	常	必	亦	之	解	先
究	研	佛	有	能	方	論	生
足	究	教	甚	領	法	之	所
以	者	衰	大	會	故	規	著
發	有	落	之	如	雖	矩	書
明	二	如	光	是	最	而	字
佛	事	今	明	努	難	篇	字
教	一	日	惟	力	解	章	句
興	為	其	余	求	之	結	句
衰	教	於	所	進	宗	構	皆
成	史	救	奢	於	旨	則	確
敗	一	教	望	中	一	一	守
分	為	之	於	國	經	依	以
合	教	功	先	佛	疏	現	經
聚	制	用	生	學	說	代	釋
敬	前	最	者	之	初	科	經

人	之	現	必	遠。	之	之	之
為	正	救	有	若	經	法	所
然	教	國	最	轉	過	應	由。
也	而	救	大	而	若	由	後
亦	為	教	之	從	僅	之	者
曾	後	之	貢	教	就	道。	之
見	來	途	獻	史	經	闕	研
之	興	徑。	不	教	論	於	究。
於	起	夫	獨	制	之	密	可
史	之	密	有	作	內	法	以
論。	法	法	裨	有	容	之	知
余	門。	非	於	條	求	所	今
嘗	此	釋	佛	統	之	由	日
疑	感	迦	學	之	行	起	吾
其	不	年	且	考	將	及	人
所	獨	尼	足	察	愈	其	所
以	余	原	以	余	求	變	應
興	個	始	發	信	愈	遷	取

操	勇	而	之	一	以	治	起
心	氣	一	嚴	大	目	軍	之
危	尤	心	格	教	相	事	原
而	為	真	修	法	殘	之	因
慮	佛	指	持	故	毀	力	蓋
患	門	即	之	其	於	以	由
深	中	身	苦	專	是	相	於
者	特	成	行	制	熟	壓	佛
絕	著	佛	皆	之	誠	迫	法
不	之	降	與	精	救	內	中
至	異	伏	原	神	教	則	衰
作	彩	魔	始	門	者	有	外
此	若	外	佛	爭	乃	獅	則
組	非	普	教	之	起	蟲	有
織	孤	度	大	霸	而	惑	異
亦	臣	群	有	氣	創	於	教
非	孽	生	不	規	制	魔	挾
處	子	之	同	律	此	外	政

修	精	法	強	文	其	傳	此
學	研	之	行	明	後	久	種
之	經	宗	之	發	亦	而	因
段	論	邦	則	達	只	致	苦
階	普	然	害	社	能	遠	艱
而	及	宗	多	會	盛	故	危
不	眾	喀	而	平	行	密	之
以	善	巴	利	靜	於	法	境
為	行	大	少	之	邊	既	過
普	法	師	其	中	地	興	中
遍	以	改	在	國	未	而	雖
傳	密	建	西	亦	開	印	有
道	法	黃	藏	不	之	度	此
之	為	教	雖	能	民	之	組
方	學	嚴	稱	推	即	佛	織
法	者	持	稱	廣	在	法	亦
亦	最	戒	為	若	自	漸	不
已	後	律	密	勉	來	微	能

			馘	則	馘	以	非
		民	華	所	華	考	舊
		國	先	普	先	求	日
		二	生	願	生	之	之
	孝	十	努	於	者	絕	宗
	園	二	力	佛	若	不	法
	主	年	為	教	此	能	矣。
	人	四	之。	大	而	得	若
	誌	月		眾	所	其	此
	於	十		者	自	究	種
	湯	日		皆	期	竟	種。
	山			在	者	也。	苟
	之			此	亦	余	非
	望			也。	若	之	從
	雲			惟	此。	可	教
	書			隨	廣	祈	史
	屋			明	言	求	教
				之	之。	於	制



金剛頂瑜伽中發阿耨多羅三藐三菩提心論淺

略釋

朱麗莎

金剛頂瑜伽中發阿耨多羅三藐三菩提心論

金剛頂瑜伽者。密宗兩部大經之一。金剛界之根本教典也。具云金剛頂一切如來真實攝大乘現證大教王經。此經中明眞言行者發菩提心功德法門。論主依以造論。故有是名。言金剛者。梵語跋折羅。華言金剛。此寶出於金中。色如紫英。百鍊不銷。至堅至利。金中精牢。故云金剛。如是如世間金剛。有堅固利用二德。如來實相智亦具此二德。故從喻立名。堅固喻實相理常住不壞。此體也。利用喻如來智用銳利。摧破惑障。顯證極理。此用也。如金剛頂

經開題云。金剛者。是世間所有堅寶名。以喻如來實智。金剛寶具多功德。此寶埋地不朽。入火不銷。貧人難見。得者富貴。戰具中最勝。常恆堅固。如是如來實智。具多功德。久埋無明煩惱地中。不曾朽爛。入無間瞋恚火。不消不融。下劣凡夫。億劫難見。若能得證。爲三界王。橫豎智杵。摧壞四魔。常住不變。自在安樂。一切衆生。從本具足。諸佛如來。自性清淨心。金剛寶藏。諸德圓備。最尊最上。故云金剛頂。如教王經疏云。金剛頂者。不是喻名。一切衆生一心法界。從本具足。金剛最尊最勝義。或此金剛教。於諸大乘法中。最勝無上。故以頂名。

次瑜伽者。譯云相應。與所觀實相相應義也。雖總通顯密觀法。而別以名真言兩部大法。相應有三。謂境行果。此當行相應。如大日經疏云。所謂相應者。卽是觀行應理之人也。觀行應金剛頂理。是曰金剛頂瑜伽。

次發者發起也。又開發也。

次阿耨多羅三藐三菩提者。菩提之具名。譯云無上正等正覺。或云正遍知。言無上正等正覺者。依般若心經。幽贊勝空者言。無法可過。故名無上。理事徧知。故名正等。離妄照真。復云正覺。如應者言。智斷圓滿。名無上覺。異生邪智。簡名正覺。二乘分智。簡名等覺。菩薩缺智。簡復名正覺。唯佛圓證。獨得全名。又法華立贊云。此卽有四覺。一無上覺。是總也。卽顯菩提清淨法界。二正覺。簡外道邪覺故。三等覺。簡二乘。但了生空。徧覺故。四又正覺。簡菩薩。菩薩因覺未滿果位。非正覺故。此顯菩薩道卽四智品。下一覺字。貫通上四。由具下三。一切莫過。超過等喻。眞理所覺。名無上覺。言正遍知者。大疏云。梵本云三藐三佛陀者。三藐名正。三名徧。佛陀名知。故曰正遍知也。（中略）正名諸法不動不壞相。徧名不爲一法二法故。以悉知一切法無餘。是名三藐三

佛陀。然此宗中。佛陀名覺。是開敷義。謂由自然智慧遍覺一切法。如盛開敷蓮華。無有點汗。亦能開敷一切衆生。故名佛也。又大日經開題云。言覺者。不眠名覺。開敷爲義。又常明故。照了故。如實知見故。一切賢聖。一切凡夫。各有分覺。然未究竟。如來兩覺。圓滿洞達。故曰大覺。

次菩提心者。就體言之。卽是諸佛清淨性海。亦是衆生本有之覺性。就用言之。謂求菩提之心。本論所說之菩提心。其後者也。三昧耶佛戒儀云。夫欲發無上菩提之心。應先深心觀察。十方諸佛清淨性海。湛寂圓明。本無生滅。廣大無礙。無相無爲。常寂滅相。愍諸衆生。爲諸妄想煩惱。迷覆淨心。不覺不知。昏昏默默。貪瞋癡毒。日夜燒溺。六賊攻劫。五欲纏縛。昏狂既盛。無所覺知。愍此輩。從大悲流演化身。不生而生。無相現相。假起言說。示現去來。皆爲憐念我等衆生。起方便智。施權實教。爲欲引導利鈍根性。施設種種頓漸法門。

是故我等慚愧諸佛慈悲方便。愍念衆生沉淪苦海。應當發起廣大之心。誓願斷除一切衆惡。誓願修習最上法門。誓願度脫諸衆生界一切有情。誓求速證無上菩提。諸佛勝果。是故發起菩提之心。所謂菩提心者。卽是諸佛清淨法身。亦是衆生染淨心。尋逐根源。本無生滅。十方求之。終不可得。離言說相。離名字相。離心緣相。妄心流轉。卽名衆生染汙之身。開發照悟。卽名諸佛清淨法身。故不增不減。經云。不離衆生界。有法身。不離法身。有衆生界。衆生界卽是法身。法身卽是衆生界。又言衆生界清淨。應知卽法身。法身卽涅槃。涅槃卽如來。以是觀之。一切衆生性淨法身。與諸佛身本無差別。而諸佛如來。昔在因地。迷本法身。與我無異。然發大精進。勤修正行。已成正覺。我今云何貪戀淤泥。不起正行。故發是心。又觀衆生沉淪苦海。沒生死河。迷自心源。喪失慧命。愍念彼等。與我法身平等無二。云何信任。不垂救拔。是故勇猛發

起大悲度諸衆生破魔怨敵是故發起菩提之心。

此論亦名瑜伽總持教門說菩提心觀行修持義。瑜伽義如上釋。總持者梵語陀羅尼。譯云總持。謂眞言陀羅尼一字含無量義。一句總持無量法門。此卽衆生覺悟入門。故曰教門。此教門中說菩提心。故曰說菩提心觀行修持義。

龍猛菩薩造

龍猛菩薩者。密教付法第三祖也。梵語那伽闍賴樹那。此云龍猛。舊譯曰龍樹。訛略也。現迹於佛滅後八百年中。（關於龍猛出世之時代。有種種異說。茲從付法傳。）出南天竺婆羅門種。幼而叡明。學四吠陀。修天文地理等學。藝窮其蘊奧。比弱冠。聲譽已被四表。大耽逸樂。卒悟世樂。還爲苦因。翻然出家。修小乘三藏。不滿之。欲得深妙之教典。入雪山。遇山中之老比丘。以大乘

經典授之。誦持愛樂。周遊五天。更求餘經。遂往龍宮。誦出華嚴經。更入南天鐵塔中。親受金剛薩埵灌頂。誦持毘盧遮那如來真實法門祕密最上曼荼羅教。流傳人間。

關於此論之作者。有二說。一說龍猛造。一說興善寺大廣智不空三藏集。
大興善寺三藏沙門大廣智不空奉詔譯

不空三藏。付法第六祖也。大興善寺者。譯者不空三藏所住寺名。三藏者。經律論也。美稱通達此三藏之人曰三藏沙門者。梵語譯云功勞。又云勤息。勞劬修佛道義。又勤修息煩惱義。出家之通稱也。大廣智者。唐代宗所賜號。不空者。入壇灌頂時登壇散華之金剛號也。不空三藏師子國人。年十五師事金剛智三藏。於開元八年。隨金剛智入唐。及開元二十年。金剛智示寂。奉遺命。往五天并師子國。廣求密藏。天寶五年。還京。於宮中立灌頂壇。爲帝灌頂。

後祈雨止風有驗。賜號智藏。自天寶至大歷六年。譯出密部經軌。凡七十七部。代宗永泰元年。進號大廣智三藏。大歷九年夏。示疾。六月十五日寂。壽七十。賜諡大辨正廣智三藏。此土之密教。至三藏而一新。融會兩部。發揮不二一雙之妙義。貞元錄讚爲冠絕古今。首出僧倫云。

本論分行願勝義三摩地三段。述欲依密教之教旨求菩提者。當發如是菩提心。修如是菩提行。於中初述菩提心之大意。次次第釋行願勝義三摩地。行願菩提心者。修大悲萬行。救濟一切有情。令發起菩提心之利他妙行也。修行發願故名行願。願者。念一切有情皆含如來藏性。皆堪安住無上菩提。願以佛乘而令得度也。行者。爲此修行五大願也。勝義菩提心者。修一切法無自性觀。證得無上菩提之自利妙行也。止息劣法。觀顯勝義。故名勝義。此有教觀二門。觀凡夫外道二乘十地菩薩等四類。次第捨劣取勝。終安住於普賢大菩提心。此觀門之勝義也。又觀諸法。覺悟其無自性。止除一切妄惑。從眞起用。萬德斯具。此教門之勝義也。如是一就所住教云勝義。一就所顯理云勝義。三摩地菩提心者。修五相三密等祕密觀行。卽身現證本尊身之妙行也。三摩地譯云等持。又云等念。又云等至。行者入信解地。修三密相應。

之五部祕觀等持諸佛自行化他之萬德故名等持。徧入有情界平等攝受而護念之故名等念。無所不至故名等至。行願以大悲爲體。下轉方便也。勝義以智慧爲體。上轉方便也。三摩地上轉下轉隨所向處。悉是金剛體。此三者卽大悲大智大定三德也。

大阿闍梨云。若有上根上智之人。不樂外道二乘之法。

阿闍梨。此云軌範師。是能教弟子法式之義。又翻爲正行。以此人能化弟子之行故。初爲一般教師之通稱。後乃爲密宗所專用。局於傳授眞言祕法之職位。如大日經云。若於此曼荼羅種種支分（謂治地擇時定日築壇畫像結界等）乃至一切諸尊眞言手印。皆悉進達。得傳法灌頂。是名阿闍梨。本論大阿闍梨言。指付法第二祖金剛薩埵。如五密藏訣云。金剛薩埵者。卽是普賢大菩薩異名也。亦名一切如來長子。亦名大阿闍梨。或大阿闍梨言。指

金剛智三藏論初舉大阿闍梨者。一爲表信心。如諸經初置。如是我聞言。表信成就。二爲顯付法相承。密教以付法相承爲宗故。

上根上智者。眞言密教正所被機。簡下根下智。謂深信卽身成佛之教理。從阿闍梨之指導。入灌頂曼荼羅。傳承三密教法。如說修行。以我功德力。如來加持力。及以法界力。三力加持故。卽父母所生身。頓入佛地之機類。如大日經開題云。若有上根上智。能信能修。則頓超十地。頓入佛地。又云。自非上上決定之信解。空空無著之心智。誰能信難信之法。入難入之門。又大智度論云。佛法大海。信爲能入。智爲能度。

外道者。傳燈錄云。心外求法。名爲外道。俱舍立義云。學乖諦理。隨自妄情。不返內覺。稱爲外道。謂數論勝論等也。若依大疏。凡一切不了內證祕密法者。皆是外道。則外道名字。通九種住心。二乘者。聲聞緣覺也。若依五教章。二乘

有三種。一者一乘三乘名爲二乘。二者大乘小乘爲二。三者聲聞緣覺爲二。則二乘名字可概顯教。

有大度量勇銳無惑者宜修佛乘。

大度量者智慧也。勇銳者精進也。無惑者無疑也。決定諦信我卽法界我卽毘盧遮那也。如十住心論云。若有衆生。生輪王種性。有大度量勇銳。不樂前諸住宮。則許大日所乘一體速疾神通寶輅。具授灌頂職位。令受用剎塵無盡莊嚴寶藏。

佛乘者眞言密乘也。三密妙行五部祕觀也。如大疏云。略說法有四種。謂三乘及祕密乘。眞言教法者。諸佛如來成佛所乘神通寶輅。故名佛乘。

當發如是心。我今志求阿耨多羅三藐三菩提。不求餘果。

本論所說凡四種心。其中第一信心。根本總體也。勝義行願三摩地。其行相

也。此第一信心。如戒儀云。欲入此乘修行者。先發四種心。一信心。二大悲心。三勝義心。四大菩提心。初信心者。爲欲決定堅固無退失。故發此心。（下略）此初信心。約發菩提心。如金剛頂三十七尊心要云。夫修行者。初發信心。以表菩提心。卽大圓鏡智。紇哩娜野心。是衆生內心。又大疏云。菩提心卽是白淨信心義也。又守護國界主陀羅尼經云。然彼一切智。以信心爲根本。以深般若而爲先導。大菩提心及大悲心爲莊嚴。此中阿耨多羅三藐三菩提者。所求心。卽是諸佛清淨性海。所謂無盡莊嚴金剛界身是也。餘果者。餘聲聞緣覺二乘及人天等果報。如遺誠云。凡出家修道。本期佛果。不更要輪王梵釋家。豈况人間少少果報乎。

誓心決定故。魔宮震動。十方諸佛。皆悉證知。

誓心決定者。要契至誠爲誓。一定不移曰決。如大疏云。決定心者。謂隨聞善

友等如法教命。便卽不生疑慮。至心奉行。然亦當以慧觀察。生正決定心也。魔宮震動者。明真言行人發菩提心時。天魔宮殿破裂。身心不安也。如乘法要義論云。彼初發心菩提。纔發大菩提心。卽能勝過一切聲聞緣覺。魔宮震動。一切天魔咸生恐懼。以恐懼故。咸不能安止其宮。又教相記云。魔宮者。淺略義。名天魔所居也。深祕義。爲煩惱魔宮也。按智度論。魔此云殺者也。震動者。謂六種震動也。大疏云。六種震動義。餘經具說其相。今依此宗祕密釋中。六種。謂貪瞋癡見慢疑六根本煩惱。一切衆生心地。常爲此重垢所持。不能自起。今以世尊至誠之所感動。悉皆甲拆開散。佛種萌生。故云六種震動也。十方諸佛等者。明十方諸佛隨喜證誠。行者發菩提心。同古佛所行妙道。故蒙諸佛證誠知見也。

常在人天受勝快樂。所生之處。憶持不忘。

常在人天受勝快樂者。明最初發心得益也。槓尾上人義云。此論意於四種心。一一其得益各別也。其中信心入佛法初門。勢力微弱故。或爲種子。或爲能入。此故其得益人天勝妙果報也。是離三惡趣。受人天益。故於得益者。最初也。於佛法者。初門也。次行願心得益者。論釋永超外道二乘境界。故住菩薩地位也。次勝義心得益者。論判復修瑜伽勝上法人。能從凡入佛位者。亦超菩薩十地境界。故超十地位。住等覺地分齊也。次三摩地菩提心得益者。從凡入佛位也。（中略）而此四心。一行者上。同時俱起。無時暫忘。故信及悲智定四德。一一皆直達佛位。達佛位故。擬外迹時。自離惡趣分齊爲信心。自超外道二乘位爲大悲等也。

所生之處憶持不忘者。明生生世世受持不忘也。下文云。乃至成佛無時暫忘。

若願成瑜伽中諸菩薩身者亦名發菩提心。

此明修本尊觀亦名發菩提心也。成佛外若願成兩部中諸菩薩之一菩薩身。口誦其真言。手結其印契。心住其三摩地。亦名發菩提心。

何者爲次。諸尊皆同大毘盧遮那佛身。

顯教談菩薩身。俱從因向果。修一行成一善。次第增進。至萬德圓滿。始達佛果。密教不然。其列菩薩身之次第。從果向因。從自受用佛身。流出無量菩薩。莊嚴無量佛法。佛菩薩皆同一性。謂金剛性。任拜何尊。信何法。皆是大毘盧遮那佛身。是故願成瑜伽中諸菩薩身者。亦名發菩提心。如金剛頂修證法門序云。自受用佛。從心流出無量菩薩。皆同一性。謂金剛性。又金剛頂經云。奇哉一切佛。廣大無始生。由一切塵數。獲得佛一性。又金剛界禮懺經云。三十七尊。並是法佛現證菩提內眷屬。毘盧遮那互體。又大日經開題云。所以

然者。於如是大曼荼羅王清淨法門之體。是一一菩薩各從一門而得自在。若有衆生。從彼一門而進行者。不久卽得同彼菩薩。此諸菩薩皆是。大日如來內證德故也。

如人貪名官者。發求名官心。修理名官行。若貪財寶者。發求財寶心。作經營財物行。凡人欲爲善之與惡。皆先標其心。而後成其志。所以求菩提者。發菩提心。修菩提行。

白淨信心。曰發菩提心。勝義等三門。曰修菩提行。如戒儀序云。言菩提心者。此有二種。一能求菩提心。二所求菩提心。能求心者。譬如有人。欲爲善與惡。必先標其心。而後行其行云云。求菩提之人。亦復如是。又如狂人解毒。忽起歸宅之心。遊客事畢。乍發懷土之思。求菩提之心。亦復如是。旣知狂醉在三界之獄。熟眠臥六道之藪。何不驅神通之車。速歸本覺莊嚴之牀。

既發如是心已。須知菩提心之行相。其行相者。三門分別。

菩提心之行相者。修菩提行之相也。

諸佛菩薩。昔在因地。發是心已。勝義行願三摩地爲戒。乃至成佛。無時暫忘。

菩薩卽因位。言昔在因地者。指最初發心位。此明諸佛菩薩從最初發心位。乃至成佛。無時無地。不以此勝義行願三摩地爲戒。守而勿失也。

行願心名戒者。戒儀序云。戒有二種。一毘奈耶。此翻調伏。二尸羅。翻云清涼。寂靜。觀一切衆生。猶如己身。及四恩。是故不敢殺害其身。命。觀衆生猶如己身。故不敢奪盜其所有財物。觀衆生猶如四恩。故不敢凌辱污穢。觀衆生猶如己身。四恩。故不敢欺誑。觀衆生如己身。四恩。故不敢以麤惡語罵詈。觀衆生如己身。四恩。故不敢離間。觀衆生如己身。四恩。故不敢綺語。觀衆生如己

身四恩。故不敢貪求所有財色。觀衆生如己身。四恩故不敢瞋恚前人。觀衆生如己身。故不敢起愚癡心行。是則由大慈悲行願故。自然離十不善心。離十不善等。卽是調伏戒。由離其惡心。故心中得清涼寂靜。是則尸羅之戒。亦是饒益有情之戒。

勝義菩提心名戒者。十住毘婆沙論云。若離我我所。遠離諸戲論。一切無所得。是名淨尸羅。戒儀序云。又以深般若妙慧。觀前九種住心無自性。云何無自性。謂如冬凍遇春卽泮流。金得火卽消鎔。諸法皆從緣生。無自性。是故異生羝羊凡夫。一向惡心。遇善知識。教誘故。起愚童持齋心。愚童人乘人。信因果故。起生天護戒心。嬰童無畏心。嬰童無畏心。願殊勝解脫智故。依善知識。誘發唯蘊無我拔業。因種二乘心。二乘之人。蒙諸佛驚誘故。起他緣大乘心。他緣大乘人。願最勝果故。起覺心不生心。覺心不生人。無自性故。起一道如

實心。一道如實心人。蒙諸佛驚覺。故發極無自性心。極無自性人。願究竟最勝金剛心。故發祕密莊嚴心。是皆由無自性。故展轉勝進。以深般若觀無自性。故自然離一切惡。修一切善。饒益自他衆生。卽是三聚妙戒。具足無缺。

三摩地菩提心名戒者。息三業之非惡。證三密之本寂。是尸羅義。

乃至成佛無時暫忘者。十住心論云。言常以金剛三密業用互於三世。令自他有情受妙法樂也。

惟眞言法中卽身成佛。故是說三摩地法。於諸教中闕而不書。

眞言梵曰曼怛攞。卽是眞語如語。不妄不異之音。舊譯云咒。又稱明。眞言法者。眞言教法也。修證法門序云。夫眞言陀羅尼宗者。是一切如來祕奧之教。自覺聖智修證法門。大疏云。一一聲字。卽是入法界門。故得名爲眞言法教也。卽身成佛者。此宗談三密加持。卽身成佛。如金剛頂經云。修此三昧者。現

證佛菩提。

是說三摩地法等者。諸顯教中。雖說無量三摩地門。而非三密五相三部五部之三摩地。如卽身成佛義云。是說三摩地法者。法身自證三摩地。諸教者。他受用身所說顯教。又二教論云。諸教者。他受用身及變化身等所說法。諸顯教也。是說三摩地法者。自性法身所說祕密真言三摩地門是也。所謂金剛頂經十萬頌經等是也。又大日經指歸云。此三摩地門。唯在此祕密教。自餘一切修多羅中。闕而不書。

一者行願。二者勝義。三者三摩地。

初行願者。謂修習之人。常懷如是心。我當利益安樂無餘有情界。

此下明行願菩提心。戒儀序云。大悲心者。亦名行願心。言外道二乘不起此心。但有菩薩大士。能發此心。觀法界無緣一切衆生。猶如己身。所以然者。善

人之用心。先他後己。又達觀三世。皆是我四恩。四恩皆墮三惡趣。受無量苦。吾是彼之子也。亦彼之資也。非我誰能拔濟。是故發此大慈大悲心。修習者。大論云。禪定心共行。名爲修。日日漸學。是名習。有情者。梵云薩埵。此言有情。有情識故。又有情者。愛也。能有愛生故。無餘有情界者。徧衆生界義。餘卽未盡之義。今盡言之。名爲無餘。

觀十方含識猶如己身。

含識者。心依色中。名爲含識。總攝六道有情之衆。觀十方含識猶如己身者。觀一切衆生及與己身。一味一相。無有差別。如心地觀經云。有情輪迴生六道。狀如車輪無始終。或爲父母。或男女。生生世世互有恩。又釋論云。一切衆生平等平等。唯一眞如。無有差別。衆生身命及我身命。一味一相。不相離故。所言利益者。謂勸發一切有情。悉令安住無上菩提。終不以二乘之

法而令得度。

勸發一切有情至終不以二乘之法而令得度者。十住毘婆沙論云。若墮聲聞地及辟支佛地。是名菩薩死。若墮於地獄。不生如是畏。若墮二乘地。卽爲大怖畏。墮於地獄中。畢竟得至佛。若墮二乘地。畢竟遮佛道。故菩薩應以大法化生。終不以二乘之法而令得度。

今眞言行人。應知一切有情。皆含如來藏性。皆堪任安住無上菩提。是故不以二乘之法而令得度。

此明所以不以二乘之法。令有情得度者。以皆堪任安住無上菩提故。有情何以皆堪任安住無上菩提。以皆含如來藏性故。如來藏性者。理趣經述讚云。此眞性正實如來。藏在纏中。名如來藏。勝鬘經寶窟云。如來性住在道前。爲煩惱隱覆。衆生不見。故名爲藏。是衆生藏如來也。顯揚聖教論云。隱名如

來藏顯名爲法身。言一切有情皆含如來藏性者。大論云。白石有銀性。黃石有金性。水是濕性。火是熱性。一切衆生有涅槃性。以一切妄識無不可歸自眞性故。如經說言。衆生亦爾。悉皆有心。凡有心者。定當得成阿耨菩提。以是義故。我常宣說一切衆生悉有佛性。又涅槃經云。佛性者。非內非外。雖非內外。非失壞故。名衆生悉有佛性。又大疏云。如說如實知自心。名一切種智。則佛性一乘。如來祕藏。皆在此中。

故華嚴經云。無一衆生而不具足眞如智慧。但以妄想顛倒執着而不證得。若離妄想。一切智自然智無礙智則得現前。

此引八十華嚴如來出現品文。證成一切有情皆含如來藏性義。疏云。所以知佛智徧者。無一衆生不有本覺。與一切佛體無殊故。(中略)次但以下釋疑。疑云。佛性者。名爲智慧。有智慧時。則無煩惱。今有佛智。那作衆生。釋中

先順答前義。謂倒故不證。豈得言無（中略）後若離下。反以理成。謂若先無離倒寧有。既離倒則現明。本不無。妄想者。妄分別之想。如大乘義章云。凡夫迷實之心。起諸法相。執相施名。依名取相。所取不實。故曰妄想。一切智自然智無礙智者。始覺圓智。永斷一切障。滿足一切德。窮達一切法。圓照一切境。名一切智。本覺性智。無始無終。古今常湛。自然開發。不由他悟。名自然智。前之二智。其體無殊。德體無礙。始本無二。名無礙智。真如智慧。原文作如來智慧。妄想顛倒執着。六十華嚴作顛倒。自然智作無師智。

所言安樂者。謂行人既知一切衆生畢竟成佛。故不敢輕慢。

不敢輕慢等者。法華經云。有一菩薩比丘。名常不輕。得大勢。以何因緣。名常不輕。是比丘凡有所見。若比丘。比丘尼。優婆塞。優婆夷。皆悉禮拜讚歎。而作是言。我深敬汝等。不敢輕慢。所以者何。汝等皆成菩薩道。當得作佛。

又於大悲門中。尤宜拯救。隨衆生願而給付之。乃至身命而不恡惜。令其安存。使令悅樂。既親近已。信任師言。因其相親。亦可教導。衆生愚蒙。不可強度。眞言行者。方便引進。

於化他行。有四攝。攝化有情。顯教名布施。愛語。利行。同事。密教名鈎索鎖鈴。鈎者鈎召義。布施也。如世人依衣食等布施。故卽起來集會。菩薩以財法二種。布施攝衆生也。若衆生樂財。卽以財施。攝之。若衆生樂法。卽以法施。攝之。衆生既蒙二施利益。因是生親愛心。依附受道。得住眞理。故名布施。攝索者。引入義。愛語也。謂菩薩隨順衆生根性。善言慰喻。則一切衆生樂聞善言。因是生親愛心。依附受道。得住眞理。故名愛語。攝鎖者。鎖縛義。利行也。謂菩薩起身口意善行。利益一切衆生。因是生親愛心。依附受道。得住眞理。故名利行。攝鈴者。歡喜義。同事也。謂菩薩以法眼明見衆生根性。隨其所樂。卽分形

示現同其所作。使其各霑利益。因是生親愛心。依附受道。得住真理。故名同事攝。此四同言攝者。攝卽攝受也。謂菩薩欲化導衆生。必須以此四法攝受。使其依附。然後導以大乘正道。此中於大悲門中尤宜拯救者。總句隨衆生願而給付之。已下別明四攝方便引進者。如法華經云。爾時長者將欲誘引其子而設方便。又維摩經云。先以欲鈎牽。後令入佛智。

二勝義者。觀一切法無自性。云何無自性。謂凡夫執着名聞利養資生之具。務以安身。恣行三毒五欲。

此下明勝義菩提心。戒儀序云。爲欲簡擇如是諸法。教發第三勝義心。亦名深般若心。眞言行人欲早歸自心本宅。先須簡知諸乘之差別。故觀一切法無自性。一切法者。約文是凡夫外道二乘及十地菩薩約義。是九種住心。無自性者。前前皆不住。故名無自性。

謂凡夫等已下。凡夫段也。凡夫者。梵語婆羅必栗託佉那。此云愚異生。義譯爲凡夫。言愚癡闇冥。無有智慧。但起我見。不見無漏故。如大疏云。凡夫者。正譯應云異生。謂由無明故。隨業受報。不得自在。墮於種種趣中。色心像類。各差別。故曰異生也。又大威德陀羅尼經云。於生死迷惑流轉。住不正道。故名凡夫。又佛性論云。凡夫以身見爲性。執着名聞等者。一着利養。求飲食衣服。臥具醫藥四事故。少欲知足。則能治之。二喜名聞。爲勝他故。正念定慧。則能治之。三資生者。畜八種也。一畜田宅。二種根栽。三販賣米穀。居店求利。四畜奴婢人民。五養羣畜。六畜金銀錢寶。七畜象牙金銀刻鏤諸寶。大牀錦褥。氈氍。八畜銅釜鐘。一切不求。見不淨故。務以安身者。無量壽經云。然世人爲心走使。無有安時。有田憂田。有宅憂宅。牛馬六畜。奴婢錢財。衣食什物。復共憂之。適有一復少一。身心俱勞。坐起不安。恣行三毒五欲者。三毒貪瞋癡也。

對一切順情之境。引取無厭。名之爲貪。對一切違情之境。便起忿怒。名之爲瞋。迷一切事理之法。無明不了。名之爲癡。毒者。毒害也。謂貪瞋癡皆能破壞。出世善心。故名毒也。五欲者。一色欲。色卽世間青黃赤白及男女等色也。謂人以色悅情適意故。至貪求戀着。不能出離三界。是爲色欲。二聲欲。謂絲竹環珮之聲及男女歌詠等聲。能令衆生樂着無厭。故名聲欲。三香欲。謂男女身香及世間一切諸香。能令衆生樂着無厭。故名香欲。四味欲。謂種種飲食肴饈等美味。能令衆生樂着無厭。故名味欲。五觸欲。謂男女身分柔輭細滑。寒時體溫。熱時體涼。及衣服等種種好觸。能令衆生樂着無厭。故名觸欲。五塵非欲。而其中有味。能起行人須欲之心。故言五欲。

真言行人誠可厭患誠可棄捨。

真言行人誠可厭患等者。戒儀序云。異生羝羊凡夫。專造十不善等業。耽三

毒五欲之樂。不曾知後身墮三途極苦。是故真言有智人不可樂着。

又諸外道等。戀其身命。或助以藥物。得仙宮住壽。或復生天。以爲究竟。

此外道段也。或助以藥物等者。大疏云。若五通仙人。以諸藥物種種鍊冶。能化土石之類。盡爲金寶。其有服食之者。住壽長遠。神變無方。又云。持明仙者。是餘藥力等所成。或復生天等者。生三界諸天也。

真言行人。應觀彼等。業力若盡。未離三界。煩惱尙存。宿殃未殄。惡念旋起。當彼之時。沈淪苦海。難可出離。當知外道之法。亦同幻夢陽燄也。

業力若盡等者。不思議業力。雖遠必相牽。果報成熟時。求避終難脫。如大論云。譬如尺蠖。屈後足。然後進前足。所緣盡。無復進處而還。外道依止初禪。捨

下地欲乃至依非想捨無所有處。上無復所依。故不能捨非想處。又俱舍論釋無想天云。先修定行勢力盡。故於彼不能更修定。故如箭射空。力盡便墮。若諸有情。應生彼處。必有欲界順後受業。順後受業者。業有四種。一順現受業。此生作業。此生感果。二順生受業。此生作業。次生感果。三順後受業。此生作業。二生已後感果。四不定受業。此復有二。一報果定感果之時期不定。二報果及感果之時期俱不定。

煩惱未除者。煩是擾義。惱是亂義。擾亂有情。故名煩惱。今所云發業潤生煩惱也。如成唯識論云。生死相續。由惑業苦。發業潤生煩惱。名惑。能感後有諸業名業。業所引生衆苦名苦。宿殃未殄者。如大論言。佛世有一外道。名鬱頭藍弗。坐得非非想定。嘗於林下水際修之。爲魚鳥所喧。發起嗔毒。欲害魚鳥。以定力故。生無色界。非非想天。以嗔害故。彼命終墮飛狸中。能飛空捕禽入

水取魚以食之。生無色界非非想天者。順生受業之果也。墮欲界之飛狸中者。順後受業之報也。惡念旋起者。禪定有二。一定靜慮。此身在欲界。已斷欲界惑。得色無色界定也。二生靜慮。此由已得之定力。或生色界或生無色界也。有於定靜慮起惡念人。如大論言有一比丘。得四禪定時。起增上慢。謂得四果。得初禪時。謂是初果。第二禪時。謂是二果。第三禪時。謂是三果。第四禪時。謂得第四阿羅漢果。不復求進。命欲盡時。見有四禪中陰相來。便起邪見。謂無涅槃。佛爲欺我。起邪見故。失四禪中陰。便見阿鼻泥梨中陰相。命終即生阿鼻地獄。有於生靜慮起惡念人。如六度經言。彼諸天壽命長遠。無諸苦惱。命欲終時。五衰相現。此時新生天女。皆悉遠離。棄之如草。此天見此相。噉噉悲號。悶絕墜地。角眼相視。即便命終。當彼之時者。命終時也。苦海者。三惡趣也。幻夢陽燄者。心地觀經云。無想諸天八萬歲。福盡還歸諸惡道。猶如夢

幻與泡影亦如朝露及電光

又二乘之人。聲聞執四諦法。緣覺執十二因緣。知四大五陰。畢竟磨滅。深起厭離。破衆生執。勤修本法。剋證其果。趣本涅槃。已爲究竟。

此二乘段也。聲聞者。聞佛聲教。故名聲聞。如瑜伽師地論云。諸佛聖教。聲爲上首。從師友所。聞此聲教。展轉修證。永出世間。小行小果。故名聲聞。此人聞佛聲教。修苦集滅道四諦之法。而悟真空涅槃之理。以此之法。運出三界。故名聲聞乘。四諦者。一苦諦。三界六趣之苦報也。苦以逼惱爲義。一切有漏色心。常爲無常。患累之所逼惱。故名爲苦。二集諦。貪瞋等煩惱及善惡諸業也。集以招聚爲義。若心與結業相應。未來定能招聚三界六趣生死之苦。故名爲集。三滅諦。涅槃也。滅以滅無爲義。結業既盡。無生死之患。累。真空寂滅。故名爲滅。四道諦。八正道也。道以能通爲義。八正道能通至涅槃。故名爲道。諦

以審實爲義。此四諦法門。正爲聲聞人。從聞生解。故必須藉教詮理。今明教理不虛。故云審實也。如大疏云。諦者。卽是如來真實句。

緣覺者。因觀十二因緣。覺眞諦理。故名緣覺。如瑜伽云。初發心時。亦值佛世。聞法思惟。後得道身。出無佛世。性樂寂靜。不欲雜居。修加行滿。無師友教。自然獨悟。永出世間。中行中果。故名獨覺。或觀待緣而悟聖果。亦名緣覺。又大論云。迦羅。此翻因緣覺。亦云獨覺。出值佛世。聞因緣法。名爲緣覺。出無佛世。自然得悟。名爲獨覺。此人因觀十二因緣。除於我執。而悟真空涅槃之理。以此之法。運出三界。故名緣覺乘。十二因緣者。一無明。過去世無始煩惱。覆於本性。無所明了。名爲無明。二行。由過去世煩惱。造作一切善不善行業。是名爲行。三識。由過去世惑業相牽。致令此識。一剎那間。染愛爲種。幻想成胎。是名爲識。卽是現世受胎之一念。四名色。名卽是心。色卽色質。謂從託胎已後。

至第五箇七日。身心漸發育位。卽是歌羅邏時之名也。五六入。從名色已後。生眼等六根。是名六入。六根具足。將出胎位也。六觸。出胎已後。三兩歲來。根塵識三。能有觸對。未能了知。生苦樂想。是名爲觸。七受。從五六歲至十二三歲時。因六塵觸對六根。卽能納受前境好惡等事。雖能了別。未起婬貪。故名爲受。八愛。從十四五歲至十八九歲時。貪於種種勝妙資具及婬欲等境。然猶未廣追求。是名爲愛。謂於所領受六塵中。心生渴愛也。九取。二十歲後。貪欲轉盛。於五欲境。四方馳求。是名爲取。謂求取所愛之塵也。十有。因馳求諸境。起善惡業。定當來果位也。有者業也。業能有當來果。故名爲有。十一生。由現世善惡之業。後世還受五衆之身。是名生。所謂四生六道中受生也。十二老死。從來世受生已後。五衆之身。熟已還壞。是爲老死。老死則生憂悲哭泣。種種愁苦。衆惱合集。此十二法。展轉感果。故謂之因。互相由藉。故謂之緣。若

正觀諸法實相清淨。則無明盡。無明盡。故行盡。乃至衆苦和合皆盡。如是正觀三世十二因緣。發真無漏。名爲緣覺。

四大者。謂人之身攬外地水。火風四大而成。內身四大。如金光明經云。地水火風共成身。隨彼因緣招異果。同在一處相違害。如四毒蛇居一篋。五陰者。新譯曰蘊。舊譯曰陰。又譯曰衆。蘊者。積聚義。色等五蘊。各積集同類法爲一聚。故名蘊。陰者。陰覆義。衆者。衆多和聚義。一色蘊。色有變壞質礙示現等義。總該五根五境等法。此等色法。有種種差別。和合積集爲一聚。故名色蘊。二受蘊。受者領納義。謂接違順等境。領納苦樂捨等。集爲一聚。故名受蘊。三想蘊。想者想像義。謂於諸境。構畫青黃長短男女怨親苦樂等像。隨施設種種名言。集爲一聚。故名想蘊。四行蘊。行有造作遷流二義。謂於種種苦樂等位。令心造作一切法。非法諸行。集爲一聚。故名行蘊。五識蘊。謂於色聲香味觸。

諸境上照了分別。集爲一聚。故名識蘊。畢竟磨滅者。五蘊幻身。四相遷變。深起厭離者。起信論云。法我見者。如來但爲說人無我。以說不究竟。見有五陰生滅之法。怖畏生死。妄取涅槃。

衆生執者。人執也。五蘊和合。假名爲人。無實人體。凡夫不了。妄執有常一之人。我是名人執。本法者。聲聞四諦法。緣覺十二因緣法。其果者。聲聞乘阿羅漢果。緣覺乘辟支佛果。涅槃梵語。正翻爲滅。滅煩惱故。離生死故。名之爲滅。離衆相故。大寂靜故。名之爲滅。義譯圓寂。義充法界。德備塵沙。曰圓。體窮眞性。妙絕相累。曰寂。本涅槃者。小乘涅槃。有有餘無餘二種。愛等諸煩惱已斷。尙餘現受有漏依身未滅。是名有餘涅槃。有漏依身滅盡無餘。更不復受。是名無餘涅槃。

眞言行者。當觀二乘之人。雖破人執。猶有法執。但淨意識。不知其他。

久久成果位。以灰身滅智。趣其涅槃。如太虛空。湛然常寂。

法執者。不了五蘊等法。從因緣生。如幻如化。妄生執著。計一切法。各有體性。是名法執。法執微細。二乘智劣。雖破人執。法執尚存。但淨意識。不知其他者。孟蘭盆經疏新記云。七八二識。小乘不談。十住心論云。唯蘊拔業。但知六識。畔字義云。二乘智劣。爲說六識。大乘稍勝。乃示八九。

久久成果位。謂聲聞三生六十劫。成阿羅漢果。緣覺四生百劫。成辟支佛果。以灰身滅智。下明無餘涅槃行相。如楞伽經云。味著三昧樂。安住無漏界。無有究竟趣。亦復不退還。得諸三昧力。乃至劫不覺。譬如惛醉人。酒消然後覺。彼法亦復然。得阿羅漢時。三界諸漏。因緣盡。更不復生。三界有淨佛土。出於三界。二乘生彼土。受微細殊妙身。是名變易生死。於此處耽著人空三昧。進不行菩薩道。退不還凡夫地。身心如亡。經多劫數。如惛醉人。酒醒然後覺。從

人空三昧起。迴心向大。是曰無餘還生。此惛醉多劫間。身智都滅。故曰如太虛空。湛然常寂。

有定性者。難可發生。要待劫限等滿。方乃發生。若不定性者。無論劫限。遇緣便迴心向大。從化城起。以爲超三界。

定性二乘。習執深故。要入無餘涅槃後。待劫限等滿。方乃迴心向大。如涅槃經謂須陀洹人。過八萬劫。到菩提心。斯陀舍人。過六萬劫。到菩提心。阿那舍人。過四萬劫。到菩提心。阿羅漢人。過二萬劫。到菩提心。辟支佛人。過十千劫。到菩提心。不定性者。習執淺故。雖入無餘。不待劫限滿。遇驚覺緣。便迴心向大。

從化城起。以爲超三界者。化城出法華經化城喻品。經云。譬如五百由旬險難惡道。曠絕無人。怖畏之處。若有多衆。欲過此道。至珍寶處。有一導師。聰慧

明達（中略）以方便力於險道中過三百由旬化作一城。告衆人言汝等勿怖莫得退還。今此大城可於中止隨意所作。（中略）爾時導師知此人衆既得止息無復疲倦。卽滅化城語衆人言汝等去來寶所在近。向者大城我所化作爲止息耳。法華義疏云今正取三界爲三百二乘爲二百。

謂宿信佛故。乃蒙諸佛菩薩加持力。而以方便遂發大心。

宿信佛故等者。華嚴經云宿因無失壞。法華經云我等宿福慶。今得值世尊。楞伽經云依佛驚覺。從三昧起發大心。加持者。演密鈔云加謂加被。持謂任持。佛以上神力加被。任持現前大衆。得見如是不思議莊嚴境界。方便者。施爲可則曰方便。善逗機宜曰便。大集經云能調衆生悉令趣向阿耨多羅三藐三菩提。是名方便。大心者。大菩提心也。

乃從初十信下。遍歷諸位。經二無數劫。難行苦行。然後成佛。既知聲

聞緣覺智慧狹劣亦不可樂。

此釋入大已後之修行。乃從初十信下者。法華義疏云。聲聞迴小入大。始得入菩薩十信之位。十信者。欲從凡入聖。必以信爲先導。始自信心。終至願心。總爲十信。以爲菩薩真修之方便。諸位者。菩薩乘之階位。諸經論增減不同。法相宗用四十一位。華嚴之始教用五十二位。其終圓二教用四十二位。天台之別圓二教用五十二位。五十二位者。十信。十住。十行。十迴向。十地。等覺。妙覺也。華嚴疏云。又以十信自不成位。是住方便。攝在住中。無數劫者。梵語阿僧祇劫之譯語。言無數者。顯不可數。非無數也。劫。梵語。具云劫波。此言分別時節。謂人壽八萬四千歲時。歷過百年。則壽減一歲。如是減至人壽十歲。則止。復過百年。則增一歲。如是增至八萬四千歲。此一增一減。名爲一小劫。如是二十增減。名爲一中劫。總成住壞空四中劫。名爲一大劫。三阿僧祇劫。

菩薩成佛之年數也。經十信至十迴向爲初僧祇。自初地至七地爲第二僧祇。自八地至十地爲第三僧祇。

難行苦行者。法華經云。智積菩薩言。我見釋迦牟尼如來。於無量劫。難行苦行。積功累德。求菩薩道。未曾止息。

又有衆生發大乘心。行菩薩行。於諸法門。無不遍修。

此菩薩段也。大乘心者。大者簡小之稱。乘者。運載爲義。維摩經。慧遠疏云。求佛之心。爲大乘心。菩薩行者。自利利他行也。上求菩提爲自利。下化衆生爲利他。小乘之行。唯爲自利。菩薩之行。乃兼利他。

復經三阿僧祇。修六度萬行。皆悉具足。然證佛果。久遠而成。斯由所習法教。致有次第。

六度者。梵語波羅密。舊譯云度。新云到彼岸。度者。度生死海義。到彼岸者。到

涅槃岸義。修行此法。則能自利利他。度生死海。到涅槃彼岸。故云到彼岸。一檀那波羅密。檀那。此言布施。施有三種。施金銀珠玉等。名財施。令他離毒蛇猛獸等怖畏。名無畏施。以真教妙法。施諸有情。名法施。二尸羅波羅密。尸羅。此言戒。戒有三種。能離不善。防護受持。名律儀戒。卽七衆別解脫戒等。由此修集一切佛法。證大菩提。名攝善法戒。以此戒善。濟諸有情。名饒益有情戒。三羶提波羅密。羶提。此言忍辱。忍有三種。雖遇怨敵妨害。憐愍不捨。名耐怨害忍。雖遇寒熱風雨饑渴老病死等苦。爲求菩提。悉能忍受。名安受苦忍。於一切法。能審諦觀察。名諦察法忍。又無生法忍。四毘梨耶波羅密。毘梨耶。此言精進。精進有三種。發猛利樂欲。誓成大果。名被甲精進。如法勤劬。修諸善品。名攝善精進。能以精勤。利樂含識。名利樂精進。五禪那波羅密。禪那。此言靜慮。舊云思惟修。又作禪定。一切攝心繫念。學諸三昧。皆名思惟修。靜慮者。

心體寂靜。能審慮義。心住一緣。離於散動。故名爲定。由此遠離一切分別。憎掉愛相。得輕安寂靜法樂。安住不動。名安住靜慮。由此引發六種神通。名引發靜慮。依此成辦一切利益有情事業。名辦事靜慮。六般若波羅密。般若。此言智慧。照了諸法實相之智慧也。如大論云。諸菩薩從初發心求一切種智。於其中間。知諸法實相慧。是般若波羅密。唯識論開此爲四。立十波羅密。卽六慧波羅密。此復有生空無分別慧。法空無分別慧。俱空無分別慧。三種。七方便善巧波羅密。有迴向方便善巧。拔濟方便善巧。二種。八願波羅密。有求菩提願。利樂他願。二種。九力波羅密。有思擇力。修習力。二種。十智波羅密。有受用法樂智。成就有情智。二種。萬行。一切行也。心經幽贊云。經初無數大劫。於一行中修一行。故證極喜住。經第二無數大劫。於一行中修一切行。證無功用無相住。以意樂淨。決定勇猛。後經第三無數大劫。一切行中修一切行。

中證如來住。具足者。成就義。無闕少義。

佛果者。佛陀梵語。此云覺者。隨舊略語。但稱曰佛。佛地論云。於一切法一切種相。能自開覺。亦開覺一切有情。如睡夢覺。如蓮華開。故名佛。萬行所成。故云佛果。能成萬行爲因。所成萬德爲果。

今眞言行人如前觀已。復發利益安樂無餘衆生界一切衆生心。以大悲決定。永超外道二乘境界。

上來就凡夫外道二乘及十地菩薩四法。一一詳示其無自性。不可樂著。此段示眞言行人雖未證大覺位。而由如前觀一切法無自性已。復發利益安樂無盡生死有情心。永超外道二乘境界。

復修瑜伽勝上法人。能從凡入佛位者。亦超十地菩薩境界。

前段示眞言行人發大悲心。超外道二乘。此段示修三摩地法。超十地菩薩。

上云大悲決定。此云修瑜伽勝上法。上就行願菩提心。此就三摩地菩提心論。瑜伽如前所云。譯云相應。因果相應。理智相應。生佛相應等也。眞言行人作三密修行時。不動有漏三業。能令三業同於本尊。從此一門。得入法界普門也。瑜伽勝上法者。下三摩地門所明五相三密。

能從凡入佛位者。一切衆生。色心實相。常是毗盧遮那平等智身。故修瑜伽勝上法。三密相應。能卽父母所生身。不經三僧祇。入大覺位。

又深知一切法無自性。云何無自性。前以相說。今以旨陳。

前約凡夫外道二乘菩薩之行相。作無自性觀。今陳無自性之義旨。

夫迷途之法。從妄想生。乃至展轉成無量無邊煩惱輪迴六趣。

迷途之法。從妄想生者。十住心論云。迷自心故。六道之波鼓動。大疏云。雖衆生自心實相。卽是菩提。有佛無佛。常自嚴淨。然不如實自知故。卽是無明。無

明顛倒取相故。生愛等諸煩惱。因煩惱故。起種種業。入種種道。獲種種身。受種種苦樂。如蠶出絲。無所因。自從已出。而自纏裹。受燒煮苦。又云。如世間咒術藥力。蔽惑人心。現種種未曾有事。識陰亦爾。從一念無明幻心。初出三界。究其源本。都無生滅去來。當知從衆緣生。無自性故。亦復本不生也。

輪迴六趣者。觀佛三昧經云。三界衆生。輪迴六道。如旋火輪。六趣者。天阿修羅人畜生餓鬼地獄。此六者。乃衆生輪迴之道途。故曰六道。衆生各乘因業。而趣之。故謂之六趣。

若覺悟已。妄想止除。種種法滅。故無自性。

若覺悟已等者。十住心論云。悟心原故。一大之水澄清。華嚴經云。若能善用其心。則獲一切勝妙功德。凡夫由昧心源。故隨妄念。能於妄念深照。性空名解大道。證道歌云。夢裏明明有六趣。覺後空空無大千。

復次。諸佛慈悲。從真起用。救攝衆生。應病與藥。施諸法門。隨其煩惱。對治。迷津遇楫。達於彼岸。法已應捨。無自性故。

諸佛慈悲。從真起用。救攝衆生者。梁攝論云。從真如流出正體智。正體智流出後得智。後得智流出大悲。大悲流出十二部經。又前引戒儀序云。十方諸佛清淨性海。湛寂圓明。本無生滅。廣大無礙。無相無爲。常寂滅相。愍諸衆生。爲諸妄想煩惱。迷覆淨心。不覺不知。昏昏默默。貪瞋癡毒。日夜燒湯。六賊攻劫。五欲纏縛。昏狂既盛。無所覺知。愍念此輩。從大悲流。演化身。不生而生。無相現相。假起言說。示現去來。又無量壽經云。如來以無蓋大悲。矜哀三界。所以出興於世。光闡道教。欲拯羣萌。惠以真實之利。

應病與藥。施諸法門。隨其煩惱對治者。病有淺深。藥有輕重。衆生有八萬四千煩惱。佛有八萬四千法門。二乘三乘之車。隨機而授。顯教密教之筏。任機

而說。如大論云。譬如藥師。不得以一藥治衆病。衆病不同。藥亦不一。佛亦如是。隨衆生心病種種。以衆藥治之。

迷津遇棧。達於彼岸。法已應捨。無自性故者。過河須用筏。到岸不須船。如金剛經云。知我說法如筏喻者。法尙應捨。何況非法。又金剛頂瑜伽中略出念誦經云。我是第一義。本來自清淨。筏喻於諸法。能得勝清淨。又圓覺經云。修多羅教。如標月指。若復見月。了知所標。畢竟非月。

如大毘盧遮那成佛經云。諸法無相。爲虛空相。作是觀已。名勝義菩提心。

諸法無相爲虛空相者。大疏云。以如是淨菩提心。出過諸觀。離衆相故。於一切法。得無罣礙。譬如虛空之相。亦無相故。萬像皆悉依空。空無所依。如是萬法皆依淨心。淨心適無所依。卽此諸法。亦復如菩提相。所謂淨虛空相。故經

復云。祕密主。諸法無相。謂虛空相也。

當知一切法空。已悟法本無生。心體自如。不見身心。住於寂滅平等。究竟真實之智。令無退失。

一切法空者。大疏云。若法攬因緣成。則自無有性。是故爲空。法本無生者。仁王經云。一切法性真實空。不來不去。無生無滅。同真際等法性。已悟法本無生等者。永觀律師云。既悟無生。妄何由生。空花之喻。於此宜陳。雖無花於眼。病時見有空花。於無病時不見空花。而不變空成花。不變花成空。心與妄亦爾。雖心本淨。由妄緣故。謂心生妄。如空見花。若得無生。妄念本無。如空無花。故不變心成妄。不變妄成心。誰有智人。求其自性。若有本性。是真非妄。豈有永息。心體自如者。維摩經淨影疏云。眞法體同名之爲如。不見身心等者。金剛界儀軌云。如是諦觀已。不見於身心。住寂滅平等。究竟眞實智。

安心若起。知而勿隨。妄若息時。心源空寂。

妄若息時。心源空寂者。永觀律師云。若時妄念止。生死卽本無。爾時心性明。故菩提是本有。念發卽覺。覺之卽空。前念迷卽凡。後念悟是佛。故心外不可念佛。是心作佛。是心是佛。

萬德斯具妙用無窮。

萬德斯具妙用無窮者。大日經開題云。若有衆生發菩提心。修行自乘教理。昇進證本覺一心。則能轉變迷識神心。證得自乘覺智。一切難思妙業。隨心能作。

所以十方諸佛。以勝義行願爲戒。但具此心者。能轉法輪。自他俱利。轉法輪者。轉者起也。法謂教法。輪有摧壞運轉二義。如來說法。必摧破諸障。必令衆生達佛法。故云能轉法輪也。大毘婆沙論云。是法所成。故法爲自性。

故名法輪。如世間呼金輪等輪是動轉不住義。捨此離彼義。能伏怨敵義。又圓滿義。謂轂輻輞三事具足故。

如華嚴經云。悲先慧爲主。方便共相應。信解清淨心。如來無量力。無礙智現前。自悟不由他。具足同如來。發此最勝心。佛子始發生。如是妙寶心。則超凡夫位。入佛所行處。生在如來家。種族無瑕玷。與佛共平等。決成無上覺。纔生如是心。卽得入初地。心樂不可動。譬如大山王。

此引八十華嚴十地品中初地文。明眞言行者。若發菩提心。卽入初地。得不退轉。初地。謂普賢初地。普賢初地。卽如來初地也。如佛戒儀云。第一普賢菩薩。卽如如法身。

依清涼大疏。此處總有十一偈。頌初住分。於中有四。初一頌半。依何身。次四

頌半。爲何義。次二頌。以何因。後三頌。有何相。今論所引。以何因。有何相。段也。其中悲先慧爲主。已下二頌。以大悲爲發心之因。佛子始發生。已下三頌。以過凡得聖爲發心福利之相。本經長行云。佛子。菩薩起如是心。以大悲爲首。智慧增上。善巧方便所攝。最上深心所持。如來力無量。善觀察分別。勇猛力智力。無礙智現前。隨順自然智。能受一切佛法。以智慧教化。廣大如法界。究竟如虛空。盡未來際。佛子。菩薩始發如是心。卽得超凡夫地。入菩薩位。生如來家。無能說其種族過失。離世間趣。入出世道。得菩薩法。住菩薩處。入三世平等。於如來種中。決定當得無上菩提。菩薩住如是法。名住菩薩歡喜地。以不動相應故。

又准華嚴經云。從初地乃至十地。於地地中。皆以大悲爲主。

於地地中。皆以大悲爲主者。八十華嚴十地品初地中云。佛子。此菩薩以大

悲爲主。二地中云。我當於彼起大悲心。又六十華嚴三地中云。智慧巧方便。并及慈悲心。四地中云。大悲爲首故。大慈成就故。五地中云。慈悲爲眼智慧牙。六地中云。大悲爲首。教化衆生。七地中云。念念皆以大悲爲首。八地中云。般若波羅密增上。大悲爲首。九地中云。智慧所護。廣行大悲。十地中云。大慈大悲。首覆一切衆生。

如無量壽觀經云。佛心者。大慈悲是。

此引觀經十六觀中第九眞身觀文。明諸佛如來。常住慈悲。利益安樂無餘有情。具云。以觀佛身故。亦見佛心。佛心者。大慈悲是。以無緣慈攝諸衆生。往生論注云。慈悲有三緣。一者衆生緣。是小悲。二者法緣。是中悲。三者無緣。是大悲。依如大論。衆生緣慈者。凡夫人或有學人。未漏盡者。以一慈心。視十方五道衆生。如父如母。如兄弟姊妹子姪。知識常求好事。欲令得利益安隱。法

緣慈者。諸漏盡聖人。破吾我相滅一異相故。深見諸法從和合因緣相續生理。但以慈念衆生。不知是法空。而常一心欲得樂。運大慈心以弘濟之。令隨意得樂。無緣慈者。諸佛心不住。有爲無爲性中。不依止過去世未來現在世。知諸緣不實顛倒虛誑。故心無所緣。但以衆生不知諸法實相。往來五道。心著諸法。分別取捨。以是諸法實相智慧。令衆生得之。是爲略說慈心義。悲心亦如是。以憐愍心徧觀十方衆生。苦作如是念。衆生可愍。莫令受是種種苦。無瞋無恨。無怨無惱心。乃至十方亦如是。

又涅槃經云。南無純陀。身雖人身。心同佛心。

此引涅槃經壽命品文。明敬禮初發心之人。經云。爾時會中有優婆塞。是拘尸城工巧之子。名曰純陀。與其同類十五人。俱爲令世間得善果故。捨身威儀。從座而起。偏袒右肩。右膝著地。合掌向佛。悲泣墮淚。頂禮佛足。而白佛言。

唯願世尊及比丘僧（中略）唯願哀愍受我微供。然後乃入般涅槃。（中略）爾時大眾聞佛世尊普爲大眾受於純陀最後供養。歡喜踴躍。同聲讚言。善哉善哉。希有。（中略）南無純陀。汝今已具檀波羅密。猶如秋月十五日夜。清淨圓滿。無諸雲翳。一切衆生無不瞻仰。汝亦如是。而爲我輩之所瞻仰。南無純陀。雖受人身心如佛心。汝今純陀。真是佛子。嘉祥疏云。一者明純陀獻供。亦是爲一切衆生。如來受供。亦爲一切衆生。爲衆生現同。故云心如佛心。二者明如來受供。此是不受而受。雖受實無所受。純陀獻供。亦是不施而施。雖施實無所捨。此心既同。故云心如佛心。南無者。疏云。南無。或言救我。或言歸命。或言屈膝。玄應音義云。南無。或作南謨。或言南摸。皆以歸禮譯之。（中略）或言歸命。譯人以義安命字。純陀者。本經云。言純陀者。名解妙義。汝今建立。如是大義。是故依實從義立名。故名純陀。堪繼佛種。故云眞佛子。

又云。憐愍世間大醫王。身及智慧俱寂靜。無我法中有真我。是故敬禮無上尊。

此引同經迦葉菩薩品。文明敬禮發心已後之人。憐愍者。法華經云。世尊大恩。以希有事。憐愍教化利益我等。世間者。三界也。世。遷流義。破壞義。覆真義。間中義。墮世界中故。名爲世間。如唯識述記云。言世間者。可毀壞故。有對治故。隱眞理故。名之爲世。墮世中故。名爲世間。大醫王者。維摩經云。爲大醫王。善療衆病。無量義經云。醫王大醫王。分別病相。曉了藥性。隨病授藥。令衆樂服。無我法中有真我者。演義鈔云。涅槃無我者。所謂生死。眞我者。謂大涅槃。二乘之人。但見無我。不見於我。灌頂文云。無我大我。我卽自在主宰義。大日如來。能爲諸佛中自在之王。故名大我。

發心畢竟二無別。如是一心先心難。自未得度先度他。是故我禮初

發心。

發心者。發求阿耨多羅三藐三菩提心。因也。畢竟者。得阿耨多羅三藐三菩提果也。二無別者。因果不二也。初發之心。雖在纏裏。便具究竟之性。故云發心畢竟二無別。如梵網古迹云。佛位有二。一發心滿位。二行果滿位。今入初故。初發之願。無不周圓。與佛無異。言同大覺。如契經云。發心畢竟二無別故。又六十華嚴云。初發心時。便成正覺。又大疏云。如輪王太子初誕育時。衆相備足。無所缺減。雖未能遍習衆藝。統御四洲。然已能任持七寶。成就聖王家業。何以故。以即是輪王具體故。眞言行者。初入淨菩提心。亦復如是。雖未於無數阿僧祇劫。具修普賢衆行。滿足大悲方便。然此等如來功德。皆已成就。何以故。即是毘盧遮那具體法身故。如是二心先心難者。探玄記云。佛果大心不足爲難。創起大心。此則爲難。自未得度等者。楞嚴經云。常聞如來說如

是言。自未得度。先度人者。菩薩發心。自覺已圓。能覺他者。如來度世。我雖未度。願度末劫一切衆生。

初發已爲天人師。勝出聲聞及緣覺。如是發心過三界。是故得名最無上。

初發已爲天人師等者。大疏云。又如王子始生。又已龍神兆庶之所宗歸。初發淨菩提心。亦復如是。已爲天人世間迷失正道者。作大歸依。若常途諸論所明。證此心時。卽名爲佛。是故舍利弗等一切聲聞緣覺。盡其智力。不能測量。經云。所謂出過一切聲聞辟支佛地也。又華嚴云。譬如迦陵頻伽鳥。在卵殼中。有大勢力。一切諸鳥所不能及。菩薩摩訶薩。亦復如是。於生死殼發菩提心。所謂大悲功德勢力。聲聞緣覺無能及者。

如大毘盧遮那經云。菩提心爲因。大悲爲根。方便爲究竟。

此引大日經住心品文。大疏云。佛告金剛手。菩提心爲因。大悲爲根。方便爲究竟者。猶如世間種子。藉四大衆緣。故得生根。如是次第。乃至果實成熟。名爲究竟。然以中智觀之。畢竟不生不滅。非不生非不滅。是故因果義成。若法不然。有生滅斷常之相。則墮於戲論。皆悉可破。因果義不成也。今行者觀心實相。亦復如是。出過一切戲論。如淨虛空。於內證所行。得深信力。薩婆若心。堅固不動。離業受生。成就真性生。萬行功德。從此增長。故曰菩提心爲因也。此菩提心。爲後二句因。若望生死中所殖善根。則名爲果。以觀佛法前相。故譬如有人聞善知識言。汝今宅中。自有無盡寶藏。應自勤修。方便而開發之。可使周給一國。常足無匱乏。彼人聞已。卽生諦信。如說而行。乃至施功不已。漸見前相。爾時於寶藏功德。離疑惑心。堪能發起殊勝加行。故菩提心卽是白淨信心義也。釋論亦云。佛法大海。信爲能入。如梵天王請轉法輪時。佛說

偈言。我今開甘露味門。若有信者得歡喜。此偈中不言施戒多聞忍進禪慧。人能得歡喜。獨說信人。佛意如是。我第一甚深法。微妙無量無數不可思議。不動不倚不著無所得法。非一切智人則不能解。故以信力爲初。非由慧等。而能初入佛法。爲令如是淨心堅牢增長。經中次說大悲爲根。根是能執持。義猶如樹根。執持莖葉華果。使不傾拔也。梵音謂悲爲迦盧拏。迦是苦義。盧拏是剪除義。慈如廣植嘉苗。悲如芸除草穢。故此中云悲卽兼明大慈也。且如行者修供養時。若奉一華。或塗香等。卽以遍一切處淨菩提心。興供養雲。普作佛事。發起悲願。迴向羣生。拔一切苦。施無量樂。由自善根及與如來加持法界力故。所爲妙業。皆得成就。卽是普於一切智地。乃至無餘有情界。皆悉生根也。隨行者以無疑心所修萬行。卽由大悲地界所執持故。大悲火界所溫育故。大悲水界所滋潤故。大悲風界所開發生故。大悲虛空不障礙故。

爾時無量度門任運開發。由如芽莖枝葉次第莊嚴。卽是於一切心法具足因緣義也。方便爲究竟者。謂萬行圓極。無可復增。應物之權。究盡能事。卽醍醐妙果三密之源也。又淨菩提心者。猶如眞金本性明潔。離諸過患。大悲如習學功巧。以諸藥物種種鍊冶。乃至鏡徹柔軟。屈申自在。方便如巧藝成就。有所造作。隨意皆成。規製中權。出過衆伎。故其得意之妙。難以授人也。如摩訶般若所明六度十八空三味道品總持門等。皆入大悲句中。卽彼萬行所成一切智智之果。說名方便。由內具方便故。方便之業。卽是利他。是以梵音鄔波娜亦名發起。如從種子生果。果還成種。故以爲名也。又五祕密經儀軌云。菩提心爲因。因有二種。度無邊衆生爲因。無上菩提爲果。復大悲爲根。應住大悲心。二乘境界。風所不能動搖。皆由大方便。方便者。三密金剛。以爲增上緣。能證毘盧遮那清淨三身果位。又守護經云。善男子。此深三昧。以菩提

心爲其因。以大悲爲其根。方便修習。無上菩提。以爲究竟。依吽字義。大日經及金剛頂經所明。不過此菩提爲因。大悲爲根。方便爲究竟。三句。

第三言三摩地者。眞言行人如是觀已。云何能證無上菩提。

此下明三摩地菩提心。三摩地者。立應音義云。三昧。或言三摩提。或云三摩帝。皆訛也。正言三摩地。此譯云等持。等者。正也。正持心也。持謂持諸功德也。或云正定。謂住緣一境。離諸邪亂也。大論云。一切禪定攝心。皆名三摩提。秦言正心行處。是心從無始來。常曲不端。得是正心行處。心則端直。譬如蛇行常曲。入竹筒則直。翻等持者。謂離掉曰等。令心住一境性曰持。已上皆顯教義。於密教。三摩地菩提心者。如前所云。修五相三密等祕密觀行。卽父母所生身。開顯心內曼荼羅。現證本尊身之心也。修大日如來一門普門三摩地之心也。卽本有之修生菩提心也。此心卽所求菩提也。故就機言之。雖爲求

菩提之心。論實義則菩提不在自心之外。故菩提卽心也。此中勝義行願心。雖共顯教而行者之用心不同。三摩地心。全爲密教不共之心。又三摩地心。體也。勝義行願。此上之自證化他二用也。密教不共之三摩耶戒。卽以此三種菩提心爲體。又勝義心者。金剛部行願心者。蓮華部三摩地心者。佛部也。當知法爾應住普賢大菩提心。一切衆生本有薩埵爲貪瞋癡煩惱之所縛。故諸佛大悲以善巧智說此甚深秘密瑜伽。

法爾者。法性自爾義。謂不構造其法自如此。普賢者。淨菩提心周遍法界義。如大疏云。普賢菩薩者。普是遍一切處義。賢是最妙善義。謂菩提心所起願行及身口意悉皆平等。遍一切處。純一妙善。備具衆德。故以爲名。金剛頂經疏云。婆伽梵大菩提心。普賢大菩薩。又云。婆伽梵者。果號也。大菩提心。大菩薩者。是卽因號。今以果號。因種者。爲顯毘盧遮那雖久成道。爲諸衆生示

適今證故號因位。又云。因必有果。故以爲名。普賢菩薩。卽金剛手。約智云。普賢。約理云。金剛手。如理趣經釋云。金剛手菩薩摩訶薩者。此菩薩本是普賢。從毘盧遮那佛二手掌。親受五智金剛杵。卽與灌頂。名之爲金剛手。此薩埵爲一切衆生菩提心之本體。其性堅固。猶如金剛。故名金剛。一切衆生。由此薩埵之加持力。發菩提心。如理趣經釋云。金剛手菩薩者。在毘盧遮那前月輪中。表一切如來菩提心。初發菩提心。由金剛薩埵加持。修證普賢行願。證如來地。

一切衆生本有薩埵者。本有薩埵者。自心之覺理。卽普賢薩埵。普賢薩埵。卽大菩提心。如菩提心義云。諸大乘中第九眞如理心。名爲自性清淨心。此理心中同體智性。名爲一切衆生本有薩埵。亦名普賢大菩提心。爲貪瞋癡煩惱之所縛者。無畏三藏禪要云。所言三摩地者。更無別法。直是一切衆生自

性清淨心。名爲大圓鏡智。上自諸佛。下至蠢動。悉皆同等。無有增減。但爲無明妄想客塵所覆。是故流轉生死。不得作佛。

善巧智者。稱順機宜。故名善巧。祕密瑜伽。如前所云。總稱真言法。真言法以三密相應爲主旨。三密相應。則得所期。悉地。故總稱爲瑜伽。曰祕密瑜伽者。密教之瑜伽。所以別於顯教。諸佛大悲。以善巧智等者。祕藏記云。佛知衆生身中本來自性之理。與佛等無差別。而衆生不知己之本有。本始兩覺。與佛等。恆覆蔽於六塵煩惱。而不能顯出。是故佛發悲願。垂我拔濟。衆生如我之誓願。若有衆生歸依。則住於法界。定自受法樂之。如來驚覺。而不敢違。越本願。影向行者之所以。真言印契如持護念。

令修行者於內心中。觀日月輪。

真言行者。約果地智德。以日輪形觀本尊形。約因果進修。以月輪形觀自心。

形。因果進修者如月有十六分之漸明。漸修菩薩十六三昧。從因至果也。胎藏界以開自心八葉之佛身。觀肉團心之八分爲八葉蓮華。金剛界一以滿月圓明體與菩提心相類。故一以開自心之十六菩薩故。觀肉團心爲十六分之月輪。

由作此觀。照見本心湛然清淨。猶如滿月光徧虛空。無所分別。亦名無覺了。亦名淨法界。亦名實相。般若波羅密海能含種種無量珍寶。三摩地。猶如滿月潔白分明。

由作此觀等者。明菩提心之名體。本心者。本有菩提心也。無所分別者。離一切情念分別。正體會諸法實相理。寂而常照。照而常寂。攝大乘論釋云。若智與所取不異。平等平等起。是名無分別智。無覺了者。起信論云。心性離見。卽是徧照法界義。又淨土論註云。實相無相故。眞智無知。淨法界。又曰清淨法。

界眞如也。眞如體離一切垢染。故曰淨。一切世間出世間功德所依。故曰法界。如佛地論云。淨法界眞如爲體。又七佛經云。佛有清淨法界。證眞覺智。無不了知。實相般若波羅密海者。實相卽般若體也。本覺之體。非寂非照。離虛妄相。名爲實相。卽一切種智也。謂明了一切諸法皆空。離一切虛妄相。故名實相般若。衆生由迷般若。居生死。名此岸。菩薩由修般若。到涅槃。名彼岸。藏一切功德。故曰海。能含種種無量珍寶者。萬德圓滿義。猶如滿月潔白分明者。楞嚴經云。淨極光通達。寂照含虛空。圓覺經云。圓覺普照。寂滅無二。心賦云。孤光一照。衆慮俱清。祕藏記云。念誦分限了。卽結定印。觀五字。是月輪觀。又實相觀。謂阿卑羅吽欠。先月輪安心上。輪上布五字（中略）唯一向觀月輪周遍。良久以後。月輪周遍法界。俄須忘身與月輪。住無分別智。然後爲利衆生。住大悲出觀。卷縮月輪。收斂自心。心地觀經云。凡夫所觀菩提心相。

猶如清淨圓滿月輪於胸臆上明朗而住（中略）端身正念結前如來金剛縛印冥目觀察胸中明月作是思惟滿月輪五十由旬無垢淨明內外澄徹最極清涼月卽是心心卽是月塵翳無染妄想不生

何者爲一切有情悉含普賢之心我見自心形如月輪何故以月輪爲喻爲滿月圓明體則與菩提心相類

胎藏界觀衆生之肉團心爲蓮華以其開合分因果金剛界觀之爲月輪以其圓缺分凡聖其月輪幟幟菩提心圓明體也如金剛頂經云時一切義成就菩薩摩訶薩（中略）白言世尊如來教示我云何修行云何是眞實如是說已一切如來異口同音告彼菩薩言善男子當住觀察自三摩地以自性成就眞言自恣而誦（中略）時菩薩白一切如來言世尊如來我遍知己我見自心形如月輪（中略）一切如來告言汝已發一切如來普賢心

獲得齊等金剛堅固。建立護摩儀軌。云諦想心臆間圓明可一肘。猶如秋月。光澄明仰在心。

凡月輪有一十六分。喻瑜伽中金剛薩埵至金剛拳有十六大菩薩者。

華嚴以十數爲滿數。攝無量無盡。真言密教以十六數表圓滿無盡。總以十六數該攝一切。般若十六空。月十六分等。皆依此意。凡月輪有一十六分者。當晦夕日月相並之際。月光爲日光所奪。明性全隱。日月一分相過後。月光必少現。以此一分。合其後十五分之漸明。成十六分。此十六分。卽表金剛界十六大菩薩。般若經所說十六空也。

於三十七尊中。五方佛位。各表一智也。東方阿閼佛。由成大圓鏡智。亦名金剛智也。南方寶生佛。由成平等性智。亦名灌頂智也。西方阿

彌陀佛由成妙觀察智亦名蓮華亦名轉法輪智也。北方不空成就佛由成所作智亦名羯磨智也。中方毘盧遮那佛由成法界智爲本。

於三十七尊中至由成法界智爲本者。金胎兩部曼荼羅中。金剛界有九會曼荼羅。胎藏界有八葉蓮臺十三大院。三十七尊者。金剛界九會曼荼羅根本會之本尊數也。此會說大日如來以五相現成等正覺。成正覺後以金剛三摩地現出三十七尊等。如心賦註云。且如總持教中亦說三十七尊皆遮那一佛所現。謂毘盧遮那如來。內心證自受用。成於五智。從四智流出四方如來。謂大圓鏡智。流出東方阿閼如來。平等性智。流出南方寶生如來。妙觀察智。流出西方無量壽如來。成所作智。流出北方不空成就如來。法界清淨智。卽自當毘盧遮那如來。言三十七者。五方如來各有四大菩薩。在於左右。

復成二十。(中略)已具二十五及四攝八供養。故成三十七。言四攝者。卽鈎索鎖鈴。八供養者。卽燒散燈塗華鬘歌舞。皆上有金剛。下有菩薩。然此三十七尊。各有種子。皆是本師智用流出。

五方佛位等者。阿闍佛者。東方金剛部主。梵語阿闍。具云惡乞芻毘也。譯云不動。住金剛界曼荼羅東方日輪之中臺。以薩埵王愛喜四菩薩爲眷屬。大圓鏡智者。轉第八阿賴耶識所得。影現法界萬象如大圓鏡之智也。

寶生佛者。南方寶部主。梵語縛日羅三婆縛。譯云寶生。住南輪中臺。平等性智者。轉第七末那識所得。緣諸法平等性之智也。

阿彌陀佛者。西方蓮華部主。於胎藏界。梵云阿私陀婆。譯爲無量光無量壽。於金剛界。云嚕計濕婆羅阿羅婆惹。譯爲觀自在王。於金剛界曼荼羅。住西輪中臺。以法利因語四菩薩爲眷屬。妙觀察智者。轉第六意識所得。神妙觀

察諸法自在說法斷疑之智也。

不空成就佛者。北方羯磨部主。梵語阿目佉悉地。譯云不空成就。住北輪中臺。以業護牙拳四菩薩爲眷屬。卽北方釋迦如來也。成所作智者。轉眼等前五識所得成就自利利他妙業之智也。

毘盧遮那佛者。中方佛部主。金胎兩界之主尊也。梵語摩訶毘盧遮那。左坦他誡多。直譯爲大遍照如來。義譯爲大日如來。大疏謂日有除闇遍明衆務。成辦光無生滅三義。除闇遍明者。如來智慧日光。遍一切處。作大照明。衆務成辦者。如來日光。能平等開發無量衆生種種善根。乃至世間出世間殊勝事業。莫不由之而得成辦。光無生滅者。佛心之日。雖爲無爲煩惱戲論重雲之所覆障。而無所滅。究竟諸法實相三昧圓明。而無所增。要之。大日如來者。遍法界身也。法界智者。具云法界體性智。轉第九菴摩羅識所得。諸法差別。

數過塵沙。故名法界。諸法所依。故名體。法然不壞。故名爲性。法界體性。卽六大也。大日住於此。六大法界之三昧。名爲法界體性智。此五智雖爲一身所具之智德。而爲引攝衆生。出生四方之四智四佛。此時法界體性智。住於本位。而爲中央之大日如來。此宗以蓮華譬胎藏界之理。以月或水譬金剛界之智。如祕藏記以水譬五智云。水性清淨。一切色相顯現。譬大圓鏡智。一切萬象影現。無高無下。而爲平等。譬平等性智。水中一切色相差別。顯現明了。譬妙觀察智。一切情非情之類。依水而濕長。譬成所作智。其水無所不適。譬法界體性智。

已上四佛智。出生四波羅密菩薩焉。四菩薩卽金寶法業也。三世一切諸賢聖。生成養育之母。於是印成法界體性中流出四佛也。

已上四佛智等者。四波羅密菩薩者。金剛界大日如來之四親近女菩薩也。

此四菩薩皆由大日如來流出。爲四方四佛生成養育之母。如金剛般若開題云。此四佛母生成一切諸佛菩薩。養育三世如來薩埵。一金剛波羅密菩薩。住金剛界曼荼羅中央。大日如來前。月輪卽東方。大日如來入阿閼如來之三摩地。生此波羅密。此菩薩爲東方阿閼如來生成養育之母。二寶波羅密菩薩。住大日如來右邊月輪。大日如來入寶生如來之三摩地。生此波羅密。此菩薩爲南方寶生如來生成養育之母。三法波羅密菩薩。住大日如來後邊月輪。大日如來入阿彌陀如來之三摩地。生此波羅密。此菩薩爲西方阿彌陀如來生成養育之母。四業波羅密菩薩。住大日如來左邊月輪。大日如來入不空成就如來之三摩地。生此波羅密。此菩薩爲北方不空成就如來生成養育之母。

五方佛位至流出四佛也者。金剛頂瑜伽三十七尊出生義云。由大圓鏡智。

厥有金剛平等現等覺身。則塔中方之東阿閼如來也。由平等性智。厥有義平等現等覺身。即塔中方之南寶生如來也。由妙觀察智。厥有法平等現等覺身。即塔中方之西阿彌陀如來也。由成所作智。厥有業平等現等覺身。即塔中之北不空成就如來也。由四如來智。出生四波羅密菩薩焉。蓋爲三際一切諸聖賢生成養育之母。於是印成法界體性智。自受用身。即塔之正中毘盧舍那如來也。四親近菩薩。即彼四波羅密印焉。

四方如來。各攝四菩薩。東方阿閼佛。攝四菩薩。金剛薩埵。金剛王。金剛愛。金剛善哉。爲四菩薩也。南方寶生佛。攝四菩薩。金剛寶。金剛光。金剛幢。金剛笑。爲四菩薩也。西方阿彌陀佛。攝四菩薩。金剛法。金剛利。金剛因。金剛語。爲四菩薩也。北方不空成就佛。攝四菩薩。金剛業。金剛護。金剛牙。金剛拳。爲四菩薩也。四方佛各四菩薩。爲十六大菩

薩也。於三十七尊中。除五佛四波羅密及後四攝八供養。但取十六大菩薩爲四方佛所攝也。

四方如來各攝四菩薩等者。秘藏記云。四方四佛各具四智。東方阿閼佛爲主。則是法界體性智。自餘四菩薩是四智也。餘方准之。東方阿閼佛攝四菩薩者。一金剛薩埵菩薩。住阿閼如來前月輪。二金剛王菩薩。住右邊月輪。三金剛愛菩薩。住左邊月輪。四金剛善哉菩薩。住後月輪。南方寶生佛攝四菩薩者。一金剛寶菩薩。住寶生如來前月輪。二金剛光菩薩。住右邊月輪。三金剛幢菩薩。住左邊月輪。四金剛笑菩薩。住後月輪。西方阿彌陀佛攝四菩薩者。一金剛法菩薩。住觀自在王如來前月輪。二金剛利菩薩。住右邊月輪。三金剛因菩薩。住左邊月輪。四金剛語菩薩。住後月輪。北方不空成就佛攝四菩薩者。一金剛業菩薩。住不空成就如來前月輪。二金剛護菩薩。住右邊月

輪。三金剛牙菩薩住左邊月輪。四金剛拳菩薩住後月輪。此十六大菩薩爲慧門。卽男形。出生義云。於一切如來菩提堅牢體。而生金剛薩埵焉。於一切如來菩提四攝體。而生金剛王焉。於一切如來菩提無染淨體。而生金剛愛焉。於一切如來隨所稱讚體。而生金剛善哉焉。則東方金剛威莊嚴界不動。如來四親近菩薩也。以一切如來大戒忍辱波羅密之所成就焉。由一切如來大莊嚴義。而生金剛寶焉。由一切如來大威耀義。而生金剛日焉。由一切如來大滿願義。而生金剛幢焉。由一切如來大歡樂義。而生金剛笑焉。卽南方寶光明功德界寶生如來四親近菩薩也。以一切如來無住檀那波羅密之所成就焉。就一切如來自在無染智。而生金剛法焉。就一切如來永斷習氣智。而生金剛利焉。就一切如來轉大法輪智。而生金剛因焉。就一切如來離言說戲論智。而生金剛密語焉。則西方大蓮華法藏界無量壽如來四親

近菩薩也。以一切如來三摩地大慧波羅密之所成就焉。自一切如來善巧工藝門而生金剛業焉。自一切如來大慈鎧胃門而生金剛護焉。自一切如來無畏調伏門而生金剛牙焉。自一切如來住持成就門而生金剛拳焉。卽北方變化輪作用界不空成就如來四親近菩薩也。以一切如來不捨衆生大精進波羅密之所成就焉。

四攝八供養者。八供者。大日如來爲供養。四如來。從心中流出嬉戲菩薩。鬘菩薩。歌菩薩。舞菩薩。具嬉戲華鬘清歌妙舞而供養之。約能現之佛。謂之內四供養。四如來爲答此供養。流出焚香菩薩。華菩薩。燈明菩薩。塗香菩薩。焚香捧華。燃燈塗香。以供養大日如來。約能現之佛。謂之外四供養。四攝者。大日如來。最後流出金剛鈎菩薩。金剛索菩薩。金剛鎖菩薩。金剛鈴菩薩。住四門月輪。四波羅密及此四攝八供。爲定門。卽女形。三十七尊心要云。於是毘

盧遮那佛卽住菩提心觀。徹照圓明。流出適悅莊嚴種種供養。此乃金剛喜戲菩薩大菩提心之妙用也。於不動如來曼荼羅左邊月輪而住。(中略)令具喜戲供養。毘盧遮那佛於內心流出金剛寶鬘嚴飾其體。卽集衆寶用爲莊嚴。寶聚光明。福德圓滿。五種施願。而能滿足。於南方寶生如來曼荼羅左邊月輪而住。(中略)寶鬘供養已。卽毘盧遮那於內心流出大悲方便。住三摩地心。發歌讚諷詠。而興供養已。獲得六十四種梵音。住說法無礙。其音清雅。令衆樂簫瑟筚篥。而能供養。此卽音聲爲佛事也。法利言說。本體自空。眞如凝然。法界清淨。此乃金剛歌菩薩供養語智也。於觀自在王如來曼荼羅左邊月輪而住。(中略)雖具歌詠。而未獲神通。卽毘盧遮那佛於內心中流出如來事業及衆生事業。作善巧智及自受用智。種種供養。結金剛舞印。廣大儀軌。現大神通。妙舞莊嚴。以爲佛事。微塵佛刹。供養恆沙。於三昧

門。出入無礙。此乃金剛舞菩薩妙用也。依不空成就如來曼荼羅左邊月輪而住。(中略)已上四菩薩內供養也。阿閼如來於內心中流出焚香菩薩供養毘盧遮那如來。其香雲海遍周法界。見聞覺知者能生適悅。能遍入諸佛體中。悅樂歡喜。此乃金剛焚香菩薩作大佛事供養也。(中略)香已供養。寶生如來於內心流出微妙覺華。而奉獻毘盧遮那如來。由金剛寶蓮。其華開敷光明。厥色鮮美。福德之聚。種種莊嚴。能施有情安樂之願。此乃金剛華菩薩妙用也。(中略)華已供養。未獲光明。卽觀自在王如來於內心中流出金剛智燈。承事供養毘盧遮那如來。光明照徹。護得如來五眼清淨。內外障色悉咸覩見。於內智燈照一切法。本性清淨。由若摩尼百光千明。無能映蔽。智慧之日。由斯燈焉。此乃金剛燈菩薩智照也。(中略)燈既供養。未獲清涼。卽不空成就如來於內心中流出金剛塗香菩薩。執持香印。供養毘

盧遮那如來。此妙塗香。能除一切有情鬱熱之疾。能獲如來五分法身戒定慧解脫解脫知見莊嚴其體。亦能證得清冷菩提之心。廣大圓滿。此乃金剛塗香菩薩供養也。（中略）已上四菩薩外供養也。八供養已畢。四攝之事未圓。卽毘盧遮那內心中流出金剛鈎菩薩。而召集之。夫爲鈎者。有四攝義。愛語。布施。利行。同事。而能運度無量衆生。復有難調衆魔。而能折伏。亦能控制狂象。而皆順從。卽此大菩提心。廣大圓滿。堅固猛利。決定不退。亦能召集一切賢聖。降臨道場。能滿一切眞言行菩薩。速證悉地。此乃金剛鈎菩薩召集之智也。（中略）既具鈎義。引攝之事未圓。卽毘盧遮那內心中流出金剛索菩薩。能禁制一切煩惱無明妄想昏闇之心。能縛一切苦輪。令得解脫。復能等引禪定大菩提心。一切印衆。皆來聚會。微塵佛刹。咸悉降臨。曼荼羅道場。共作佛事。（中略）索義既辨。制止之理未行。卽毘盧遮那佛於內心

中流出金剛鑊菩薩。其鑊是制止之義。能閉一切諸惡趣門。起大慈悲。於一切有情而生救護。能縛一切衆生。及以如來使。俱由解脫得大涅槃。復令微塵海會如來。於此道場。住三摩地心。同密嚴佛會。作大佛事。雖具鑊義。制止之事。遍入理智。而未圓通。卽毘盧遮那佛。於內心中。流出金剛鈴菩薩。執持光明磬。而供養之。發生無量微妙之音。一切聖衆。聞者靡不歡喜。諸佛惡字種子。能遍入一切如來身心。瑩如明鏡。於無量有情身田中。大種智。能於諸佛所。捨身而作僮僕。承事供養。於三摩地中。適悅歡樂。此乃金剛鈴菩薩之妙響也。

又摩訶般若經中。內空至無性自性空。亦有十六義。

摩訶般若經中等者。大般若經云。不取著內空。不取著外空。內外空。大空。空空。勝義空。有爲空。無爲空。畢竟空。無際空。無散空。本性空。相空。一切法空。無

性空。無性自性空。

一切有情於心質中。有一分淨性。衆性皆備。其體極微妙。皎然明白。乃至輪迴六趣。亦不變易。如月十六分之一。

一切有情等者。明一切有情心中。有一分圓明。卽菩提心是也。如涅槃經云。一切衆生。悉有佛性。如來常住。無有變易。

凡月。其一分明相。若當合宿之際。但爲日光奪其明性。所以不現。後起月初。日日漸加。至十五日。圓滿無礙。

凡月。其一分明相等者。取世間所見明月。喻本覺圓明心月。

所以觀行者。初以阿字發起本心之中。分明只漸令潔白。分明證無生智。

此敎令行者修阿字觀也。阿字爲悉曇摩多體文最初之字。此音爲本生一

切梵語。此字爲元。生一切梵字。如大疏云。阿字是一切教法之本。凡最初開口之音。皆有阿聲。若離阿聲。則無一切言說。故爲衆聲之母。又云。阿字爲一切字之種子。又理趣釋云。阿字菩提心義。爲一切字之先。譯爲無不非。如金剛頂經開題云。阿名無不非。無生智者。大乘菩薩證無生理之智也。金光明經云。無生是實。生是虛妄。愚癡之人。漂溺生死。如來體實。無有虛妄。名爲涅槃。

夫阿字者。一切諸法本不生義。准毘盧遮那經疏。釋阿字。具有五義。

一。聲是菩提行義。三。暗字短聲。是證菩提義。四。惡字短聲。是菩提心。二。阿字引聲。是具足方便智義。又將阿字配解法華經中。開示悟入四字也。開字者。開佛知見。卽雙開菩提心。如初阿字是菩提心義也。示字者。示佛知見。如第二阿字。是菩提行義也。悟字者。菩提心義也。第三暗字。是證菩提義也。入字者。入佛知見。如第四惡字。是般涅槃也。總而言之。具足成就。第五惡字。是方便善巧。四惡字。是般圓滿也。

夫阿字者一切諸法本不生義者。阿梵語具云阿提阿耨波陀。阿提此言初。阿耨波陀此言不生。謂一切法本來不生也。大品云阿字門一切法初不生。大論云得是字阿羅尼菩薩。若一切語中聞阿字卽時隨義。所謂一切法從初來不生。華嚴經云唱阿字時入般若波羅密門。名以菩薩威力入無差別境界。疏云阿者入無生義。無生之理統該萬法。菩薩得此無生達諸法空斷一切障。大日經云阿字門一切諸法本不生故。吽字義云所謂阿字門一切諸法本不生者。凡三界語言皆依於名。而名依於字。故悉曇阿字亦爲衆字之母。當知阿字門真實義亦復如是徧於一切法義之中也。所以者何以一切法無不從衆緣生。從緣生者悉皆有始有本。今觀此能生之緣亦復從衆因緣生。展轉從緣誰爲其本。如是觀察時則知本不生際是萬法之本。如聞一切語言時卽是聞阿聲。如是見一切法生時卽是見本不生際。若見本不

生際者。是如實知自心。如實知自心。卽是一切智智。眞言兩部大經。若義若法。廣大淵微。而原始要終。不外廣演此阿字本不生義。

准毘盧遮那經疏已下一段。爲夫阿字者一切諸法本不生義。文下之夾註。從義釋略出。疏無此文。亦不審何人所加入。

卽讚阿字是菩提心義。頌曰。

八葉白蓮一肘間。炳現阿字素光色。

禪智俱入金剛縛。召入如來寂靜智。

扶會阿字者。楷實決定觀之。當觀圓明淨識。若纔見者。則名見眞勝義諦。若常見者。則入菩薩初地。若轉漸增長。則廓周法界。量等虛空。卷舒自在。當具一切智。

此正明阿字觀也。扶一作夫。楷實一作皆是。會契會也。阿字觀者。易行易修。

速疾頓悟之妙法。先圖八葉白蓮。徑一肘（十六寸）量。其蓮臺上。畫淨月輪。月輪中。書金色阿字（梵文）。懸此圖於靜室之一方。爲所觀境。約隔四尺許。面之靜坐。半跏坐可。全跏坐亦可。次念誦護身法三摩耶戒眞言及發菩提心眞言。手結定印。印相有法界定印。彌陀定印。如來金剛縛印等異說。本論言禪智俱入金剛縛。卽結金剛縛印也。禪智者。左右兩大指。金剛縛者。兩手金剛內縛。次正姿勢。安着身心。調出入息。次正入阿字觀。觀壁上阿字。引其形入心月輪。阿字觀之對境有三。蓮華。月輪。阿字。前二三摩耶形。後一種子。三摩耶梵語。譯云本誓。三摩耶形者。幟幟諸佛菩薩內證本誓之塔婆寶珠五鈷刀劍等形。如不動明王之降魔劍。觀音菩薩之蓮華等。種子者。阿等一字。生無量義。譬諸草木之種子。佛菩薩明王天等。各有種子字。幟所具衆德。阿字者。大日如來之種子。而法界之體性也。此中阿字正所觀本尊蓮

華卽八葉白蓮。月輪如秋夜之明月。阿字者。金色阿字。作正方形。晝夜旦暮觀之。至閉目開目。常住現前。更漸次增大其形量。或十尺。或百尺。或一由旬。乃至倍增。觀遍虛空法界之阿字蓮月。最後觀自身內之干粟多心爲八葉白蓮。觀質多心爲圓滿淨月輪。此淨月輪上。炳現阿字素光色。隨其觀行之增進。徐入心境不二能所亡泯之境。己心凡身。與阿字本尊融合。自身卽阿字。阿字觀阿字。阿字入阿字。阿字說阿字。盡虛空法界成遍滿之阿字。是名阿字瑜伽之悉地。八葉之心蓮華。表胎藏之理法身。淨月輪。詮金剛之智法身。阿字。表理智冥合不二之總體。大日如來。故約金剛界之觀行。則先觀月輪。次觀心蓮。次觀阿字。若從胎藏界之觀行。則先觀心蓮。次觀淨月輪。次觀阿字。密教之觀行雖多。悉皆阿字觀上之廣略。無一印一明出阿字之外。召入如來寂靜智者。召入阿字於自身中。卽獲得如來智。寂靜者。離煩惱曰。

寂絕苦患云靜。卽涅槃理也。寂靜智者。證涅槃理之智也。本不生智也。

圓明淨識者。心月輪也。梵語菴摩羅。此言清淨識。亦云白淨無垢識。此識乃一切衆生清淨本源心地。諸佛如來所證法身果德。在聖不增。在凡不減。非生死之能羈。非涅槃之能寂。染淨俱泯。纖塵不立。明同皎月。湛若太虛。翻譯名義集云。熏聞云。天台依攝大乘說。菴摩羅名無別智光。卽第九淨識也。然據諸論所說第八。若至我見永不起位。卽捨梨耶之名。別受清淨之稱。是則果位名菴摩羅。唯識論云。或名無垢識。最極清淨。眞勝義諦者。本不生理也。菩薩初地者。金剛薩埵之本初心地。如前所云。卽是如來初地。非顯教所言十地中初地。卽身成佛義云。金剛頂經說（中略）若有衆生遇此教。晝夜六時精進修。現世證得歡喜地。後十六生成正覺。謂此教者。指法佛自內證三摩地大教王。歡喜地者。非顯教所言初地。是則自家佛乘之初地。（中略）

十六生者。指十六大菩薩生。眞言行者。成就十六大菩薩十六三昧。以證圓滿大覺。十六三昧。卽因行證入四轉功德。次第漸生。恰如月十六分漸生。至圓月。寄月光云十六生。一切智者。中論疏云。知一切法。名一切智。華嚴大疏云。智度論云。如函大蓋亦大。還以無盡之智。知無盡法。是故如來名一切智。一切智。於三智中。混聲聞緣覺之智。爲分別彼一切智。名佛智。爲一切智。智如大疏云。梵云薩婆若。卽是一切智。智釋論云。薩婆若多者。卽一切智。一切謂名色等無量法門。各攝一切法。如是無量三四五六等。乃至阿僧祇法門。各攝一切法。是一切法中。一相異相。漏相非漏相。作相非作相等。一切法。各各相。各各力。各各因緣。各各果報。各各性。各各得。各各失。一切智慧力。故一切世一切種盡遍知。是名薩婆若。今謂一切智。卽是智中之智也。非但以一切種遍知一切法。亦知是法究竟實際常不壞相。不增不減。猶如金。

剛。如自證之境。說者無言。觀者無見。不同手中菴摩勒果。可轉受他人也。又經中言。如是智慧。菩提心爲因。大悲爲根。方便爲究竟。

凡修習瑜伽觀行人。當須具修二密行。證悟五相成身義也。所言三密者。一身密者。如結契印。召請聖衆是也。二語密者。如密誦真言。令文句了了分明。無謬誤也。三意密者。如住瑜伽相應白淨月圓滿觀菩提心也。

契印者。梵語目帝羅。此云印契。卽以手指作印。以標示法界之性德。印者。印可決定義。契者。契約不改義。諸佛結法印。約不違其本誓。行者結之。決定必與諸佛之本誓一致。如大疏云。一切佛以此爲莊嚴故。得成如來法界之身。若有衆生修此法者。以印加持故。亦同如來法界身也。此印者。卽是法界之標幟也。卽密印皆是法界標幟。標幟者。彰表之義。謂彰表如來內證之德。若

能如法結之。則行者之身密。與本尊之身密一致。本尊之萬德悉來。成爲行者之所具。其德廣大不可思議。眞言爲諸佛菩薩乃至明王天等之本誓本願。誦此諸佛菩薩之眞言。則成就無量功德。

三密有法佛三密。與衆生三密。法佛三密者。如來自證之三密。如來身語意三業。本來平等。身等於語。語等於意。皆遍法界。是故六大法界森羅之體相。是身密。其一切音聲。是語密。其周遍之識大。是意密。衆生三密者。衆生修行之三密。此又有有相三密。無相三密二種。有相三密者。手結印契。是身密。口誦眞言。是語密。心入本尊三摩地。是意密。無相三密者。一切身業。一一語業。念念意業。悉是三密。所謂舉手動足。皆成密印。開口發聲。悉是眞言。起心動念。咸成妙觀。此二種三密。不二而二。有相卽無相。無相卽有相。仰信法佛三密。高深難測。解信衆生三密。自他互融。正修三密之觀行。曰三密相應。卽或

結一印。或誦一明。自三密具足。故結一印。誦一明。起一念觀。當處具足一切印。一切明。一切三摩地。衆生一念之三密。具足佛界。乃至十界之三密。自三密與他（本尊）三密。彼此平等。涉入無礙。曰三密相應。正體得示現此理。趣於現在三業之剎那。三密相應之義成。如卽身成佛義云。三密加持速疾顯者。謂三密者。一身密。二語密。三心密。法佛三密。甚深微細。等覺十地。不能見聞。故曰密。一一尊等。具剎塵三密。互相加入。彼此攝持。衆生三密。亦復如是。若有真言行人。觀察此義。手作印契。口誦真言。心住三摩地。三密相應。加持故。早得大悉地。

次明五相成身者。一是通達心。二是菩提心。三是金剛心。四是金剛身。五是證無上菩提。獲金剛堅固身也。然此五相具備。方成本尊身也。

此明五相成身觀。五相成身觀者。卽身成佛之要道。頓證菩提之秘術也。先修調心觀。次性空觀。次正入通達心。第一通達心者。前入無相空觀。今依徹心明力。觀自心卽性德菩提心相。知爲煩惱所覆。如月輪在輕霧中。證得此心清淨明了。如滿月輪。離諸煩惱垢染。第二修菩提心也。第三金剛心者。在前位。證得自心如清淨滿月。於此位。觀滿月輪自心中。有諸尊三摩耶身。卽金剛蓮華等。觀此蓮華。漸舒漸大。遍滿小千世界中。千世界乃至法界。是曰廣金剛觀。又更觀漸歛。漸小。還復如故。是曰歛金剛觀。第四金剛身者。入此位。在前位所觀蓮華。卽是自身。自身卽蓮華。遍法界盡虛空雲海之諸佛。入自身之蓮華而住。猶如明鏡。現萬象影。五證無上菩提。獲金剛堅固身者。至此位。前三摩耶身。成爲本尊之萬德圓滿身。自身卽佛卽菩薩。自身成隨其意樂所觀之本尊。證無上菩提。獲金剛堅固身。如金剛頂經云。行者聞警覺。

定中普禮已。唯願諸如來。示我所行處。諸佛同告言。汝應觀自心。既聞是說。已如教觀自心。久住諦觀察。不見自心相。復想禮佛足。白言最勝尊。我不見自心。此心爲何相。諸佛咸告言。心相難測量。授與心真言。卽誦徹心明。觀心如月輪。若在輕霧中。如理諦觀察。比通達菩提心位也。又云。藏識本非染。清淨無瑕穢。長時積福智。喻若淨月輪。無體亦無事。卽說亦非月。由具福智故。自心如滿月。踴躍心歡喜。復白諸世尊。我已見自心。清淨如滿月。離諸煩惱垢。能執所執等。諸佛皆告言。汝心本如是。爲客塵所翳。菩提心爲淨。汝觀淨月輪。得證菩提心。此修菩提心位也。又云。能令心月輪圓滿益明顯。諸佛復告言。菩提心堅固。復受心真言。觀金剛蓮華。(中略)汝於淨月輪。觀五智金剛。令普周法界。唯一大金剛。此成金剛心位也。又云。應當知自身。卽爲金剛界。(中略)自身爲金剛。堅實無染壞。復白諸佛言。我爲金剛身。此證金

剛身位也。又云。時彼諸如來。便勅行者言。觀身爲佛形。(中略)既見身成。佛相好皆圓備。諸如來加持。現證實相智。此佛身圓滿位也。

其圓明則普賢身也。亦是普賢心也。與十方諸佛同之。

圓明者。圓明淨識也。心月輪也。圓者。周遍義。性體周遍曰圓。明者。大慧光明。義。佛地論云。有義明者。以慧爲性。慧能破闇。故說爲明。卽普賢義也。普賢身者。理也。普賢心者。智也。初心鈔云。普賢身心者。約之可指大日身心。大日名大普賢故。與十方諸佛同之者。自他平等。與一切如來理智法身一體不二。非但是普賢身心。亦是諸佛身心也。卽身成佛義云。(上略)由衆多如來所加持故。乃至十地等覺妙覺。具薩婆若。自他平等。與一切如來法身共同。常以無緣大悲。利樂無邊有情。作大佛事。證道歌云。一月普現一切水。一切水月一月攝。諸佛法身入我性。我性同共如來合。

亦乃三世修行證有前後及達悟已無去來今。

因有先後果無異同。發心修普賢行入普賢境自然契合一切如來普賢境界無復新舊自他差別。如說普賢諸尊亦然。

凡人心如合蓮華。佛心如滿月。

凡夫心如合蓮華者。大疏謂凡夫肉心狀如蓮華合而未敷之像。有筋脉約之以成八分。佛心如滿月者。理智清淨圓滿。如滿月出現虛空。

此觀若成。十方國土若淨若穢。六道含識三乘行位及三世國土成壞衆生業差別。菩薩因地行相。三世諸佛悉於中現。證本尊身滿足。普賢一切行願。

此觀若成至悉於中現者。修月輪觀成。則十方法界普現心中。如大圓鏡洞照萬物無不明了。如圓覺經云。成就正覺。心華發明。照十方刹。又證道歌云。

心鏡明。鑑無礙。廓然瑩徹。周沙界。萬象森羅。影現中。一顆圓光。非內外。普賢一切行願者。普賢菩薩於華嚴會上。逝多林中。稱歎如來勝功德。已告諸菩薩及善財言。如來功德。十方諸佛。經刹塵劫。說不能盡。若欲成就此功德門。應修十種廣大行願。十種廣大行願者。一敬禮諸佛。二稱讚如來。三廣修供養。四懺悔業障。五隨喜功德。六請轉法輪。七請佛住世。八常隨佛學。九恆順衆生。十普皆廻向。

故大毘盧遮那經云。如是真實心。故佛所宣說。

如是真實心。故佛所宣說者。大疏云。此心處無垢清淨。猶如圓鏡。常現前。當知此即是先佛共所宣說真實之心也。如是心性。常恆安住。無有變易。不可破壞。即是諸佛大般涅槃。故名真實也。

問。前三二乘之人。有法執故。不得成佛。今復令修菩提心。三摩地者。

云何差別。答。二乘之人。有法執。故久久證理。沈空滯寂。限以劫數。然發大心。又乘散善門中。經無數劫。是故足可厭離。不可依止。

乘散善門者。依密教所判。一切顯教爲散善門。密教爲三摩地門。

今真言行人。既破人法上執。雖能正見真實之智。或爲無始間隔。未能證於如來一切智智。

無始間隔者。根本無明。法性同體惑也。能隔佛智無明也。卽是極細妄執。勝鬘本業等經。謂之無始無明。體無慧明。故曰無明。妄隔平等法界理。故曰間隔。未斷極細妄執。故不能證於一切智智。

故欲求妙道。修持次第。從凡入佛位者。

妙道者。無上菩提之妙果。欲求妙道者。發菩提心也。修持次第者。修三密行。卽此三摩地者。能達諸佛自性。悟諸佛法身。證法界體性。智成大毘

盧遮那佛自性身受用身變化身等流身

諸佛自性者。三世如來性自性第一義心也。不生不滅法性妙理也。諸佛法身者。密教立四種法身說。四種法身者。自性法身。受用法身。變化法身。等流法身。所以皆名之爲法身者。四身皆是法然法爾之妙體妙用故。又各各具足種子法曼荼羅故。故自性法身。有法爾之說法色相。受用變化等流。亦是法然之事業。自性法身者。十方諸佛之真體。三世常住。遍滿法界之佛身。如曼荼羅中臺大日如來是也。此自性法身。有智法身理法身之別。是爲兩部大經之教主。受用法身者。現微妙尊特之佛身。爲地上菩薩說真言道句。令他受用法樂。如西方阿彌陀佛是也。變化法身者。爲地前菩薩及二乘凡夫。現丈六之佛身。於塵道世界（娑婆等）說諸種真言道句。如釋迦牟尼佛是也。緣謝卽滅。機興卽生。八相成道。轉變無窮。故名變化身。等流法身者。爲

九界機現佛身已外九界之身相應機緣。宣說眞言道句。此大日之化用也。平等流演。等同九界。故云等流。要之。此四法身。皆本地身。大日如來。與十界之機緣相須奮迅。示現之佛身。以隨緣當體。卽是法爾之法身故。名爲四種法身。

爲行人未證故。理宜修之。

此勸未證四種法身者。令修菩提心三摩地也。大疏云。若不以種種方便供養行門。消融百六十心礦石之垢。何以得此淨菩提也。

故大毘盧遮那經云。悉地從心生。

悉地。梵語譯云成就。如大日經供養法疏云。悉地者成就。亦云成菩提。但成就有所成能成之別。由三密相應而成就之妙果。以梵語稱之爲悉地。爲成就此妙果。而修三密相應之因行。以華語稱之爲成就。如大疏附註云。悉地

是真言妙果。爲此果故。而修因行。故此中成就者。是作業成就。又義釋云。當得成就一切悉地。悉地從心生者。大疏云。經云。真言者當得悉地。從心生者。當知真言行者。但以方便。自淨其心。若三業清淨。當於是中。自得明了。而自覺悟也。譬如有人。夢中修行種種六度。而淨佛國。覺見則無成果之相。但是。一一無明心中。有因果萬行耳也。又如暗室之中。而有寶藏。若以方便。燃火明燈。雖因緣生滅。推不可得。本同於空。然亦明法任運而起。以明因緣。則見寶藏。非此寶藏。因方便生也。修真言行者。本爲除遣惑業當體。解法界無生滅淨染。離諸分別。知此真言之體。卽是法界之體也。若了知真言之體。卽同法界。等於大空。自然能得無相三昧。故悉地現前。當生如是信解也。

如金剛頂瑜伽經說一切義成就菩薩。初坐金剛座。取證無上道。遂蒙諸佛授此心地。然能證果。

一切義成就菩薩。卽釋迦牟尼也。釋迦如來爲太子行菩薩道時。名爲一切義成就。華嚴經云。如來於四天下中。或名一切義成。或名釋迦牟尼。又高雄口決云。卽餘教至究竟位佛。名爲一切義成就菩薩。金剛座者。三世諸佛成正覺座。大論云。地皆是衆生虛誑業。因緣報故有。是故不能舉菩薩欲成佛時。實相智慧身。是時坐處變爲金剛。有人言。上在金輪上。金輪在金剛上。從金剛際。出如蓮華臺。直上持菩薩坐處。令不陷沒。以是故此道場坐處。名爲金剛。又西域記云。菩提樹垣正中有金剛座。昔賢劫初。與大地俱起。據三千大千世界之中。下極金輪。上侵地際。金剛所成。周百餘步。賢劫千佛。坐之而入金剛定。故曰金剛座焉。如金剛頂瑜珈經說等者。本經云。婆伽梵大菩提心普賢大菩薩。住一切如來心時。一切如來。滿此佛世界。猶如胡麻。爾時一切如來雲集於一切義成就菩薩摩訶薩坐。菩提場往詣。示現受用身。咸作

是言善男子。云何證無上正等覺菩提。不知一切如來真實忍諸苦行。時一切義成就菩薩摩訶薩。由一切如來警覺。卽從阿娑頻娜伽三摩地起。禮一切如來。白言。世尊。如來教示我云何修行。云何是真實。如是說已。一切如來異口同音告彼菩薩言。善男子。當住觀察自三摩地。(中略)時菩薩白一切如來言。世尊。如來。我遍知己。我見自心形如月輪。(中略)復從一切如來承旨。發菩提心。已。作是言。如彼月輪形。我亦如月輪形。見一切如來告言。汝已發一切如來普賢心。獲得齊等金剛堅固。善住此一切如來普賢發心。於自心月輪思惟金剛形。(中略)菩薩白言。世尊。如來。我見月輪中金剛。一切如來咸告言。令堅固。一切如來普賢心金剛。(中略)所有遍滿一切虛空界。一切如來身口心金剛界。以一切如來加持。悉入於薩埵金剛。則一切如來。於一切義成就菩薩摩訶薩。以金剛名。號金剛界金剛界灌頂。時金

剛界菩薩摩訶薩。白彼一切如來言。世尊如來。我見一切如來爲自身。一切如來復告言。是故摩訶薩。一切薩埵金剛。具一切形成就。觀自身佛形。(中略)作是言已。金剛界菩薩摩訶薩。現證自身如來。盡禮一切如來已。白言。唯願世尊諸如來。加持於我。令此現證菩提堅固。作是語已。一切如來。入金剛界如來彼薩埵金剛中。時世尊金剛界如來。當彼剎那頃。現證等覺一切如來平等智。入一切如來平等智三昧耶。證一切如來法平等智自性清淨。則成一切如來平等自性光明智藏如來。應供正遍知。

凡今之人。若心決定。如教修行。不起於座。三摩地現前。應於是成就本尊之身。

凡今之人等者。卽身成佛義云。如是經等。皆說此速疾力不思議神通三摩地法。若有人不闕法則。晝夜精進。現身獲得五神通。漸次修鍊。不捨此身。進

入佛位。出生無邊門。陀羅尼義軌云。由入三平等。善住瑜伽故。自身同本尊。在凡成正覺。

是故大毘盧遮那經供養次第法云。若無勢力廣增益。住法但觀菩提心。佛說此中具萬行。滿足淨白純淨法。此菩提心能包藏一切諸佛功德法故。

自此已下。一論之總結也。廣增益者。具備七珍百味。供養諸尊。如說修行。住法者。住法軌也。淨白純淨法者。白法也。總稱一切善法。佛法中善法名白。不善法名黑。經作清白醇淨法。不可思議。疏真言行學處品云。清白醇淨法者。於體理中。恆有得恆法性。無漏功德及布施等諸度門也。

若修證出現。則爲一切導師。若歸本。則是密嚴國土。不起於座。能成一切佛事。

若修證出現已下分說秘密曼荼羅海會之德相。若修證出現則爲一切導師。所謂從真起用也。導師者善巧具足。如海導師。彼引得寶。此引成佛。十住斷結經云。號導師者。令衆生類示其正道故。華首經云。能爲人說無生死故名導師。佛報恩經云。大導師者。以正路示涅槃。密嚴國土者。金胎兩部之主尊。法身大日如來所依土也。此土爲以三密莊嚴之大曼荼羅道場。故云密嚴。如金剛頂一切瑜伽祇經云。唯此佛刹。盡以金剛自性清淨所成。密嚴華嚴。又二教論云。密者。金剛三密。華者。開敷覺華。嚴者。具種種德。言以恆沙佛德塵數三密莊嚴身土。是名曼荼羅。又大疏云。此中言悉地宮。有上中下。上謂密嚴佛國。出過三界。非二乘所得見聞。中謂十方淨嚴。下謂諸天修羅宮等。若行者成三品持明仙時。安住如是悉地宮中。不起於座。能成一切佛事。謂不經生而現身。能起成所作智用。所謂不動道場。徧十方刹也。佛事者。維

摩經註云佛事謂化衆生。

讚菩提心曰。

若人求佛慧。通達菩提心。父母所生身。速證大覺位。

佛慧者。諸佛平等大慧。卽一切智智。通達菩提心等者。謂若人欲求佛之一切智智。而得通達勝義行願三摩地三種菩提心者。卽此有漏不淨之父母所生身。超過諸地。頓入金剛秘藏。不經三劫。能於一念一時乃至一生之間。速證大覺果滿之佛位。

金剛頂瑜伽中發阿耨多羅三藐三菩提心論淺略釋

金波羅華集

詩懺華學草

大哀點讀二·一·二〇·於南京

甲寅冬客扶桑發願學佛詩以自勵并呈本師桂伯華先生

曾聞火裏有金蓮。火愈紅時色愈鮮。但使心田常濯濯。寧辭面壁坐年年。刺船肯讓成連去。慧業終居孟顓先。會得如來根本義。衆生無量願無邊。

聽桂先生講大乘論後數日夜大風感賦

夜正和寒迴。人疑結舌瘖。忽聞師子吼。似發海潮音。斷續三更夢。蒼茫萬劫心。憧憧孤焰下。擁絮一沈吟。

人日

劫後逢人日。天涯老客星。獨攜今古淚。脈脈上新亭。

效王右丞雜詩體訊合浦陳君真如

君是合浦人。當知合浦事。滄海月輪明。神珠歸來未。

海上示樹弟

蔓草已盈野。優曇曾未開。一天風更雨。吾自道場來。

寄伯華先生日本

一念自能周法界。不緣離合異悲歡。天涯忽與真人對。我向維摩卷裏看。

游廬山雜詩二十首之八

淒絕繙經臺。深深冑綠苔。軟紅迷十丈。不見白蓮開。
繙經臺

謝靈運繙經臺已被耶教徒犂爲墓地荒塚累累觸目皆紅十字矣

帝座通呼吸。諸天若可階。衆生知幾許。來上捨身崖。
捨身崖

遠公留勝跡。雁塔幾多層。莽莽東林寺。誰傳無盡燈。
東林寺

東林寺舊址僅存屋三楹餘均委蒿草矣遠公肉身塔在東西二林間號無盡燈陰雨則放光卽陽明集所謂佛燈也今猶巋然存

寒瀨森森下。冷然萬玉鳴。逍遙人世外。流水亦聰明。聰明泉
龍女弄烟鬟。散作千山雨。何處是儂家。白雲最深處。
珠玕皆叢生。禽獸皆純縞。浪遊何時還。婆娑五峯老。五老峯
謾謾松風鳴。沈沈山翠滴。幽窅四無隣。但見麕麕跡。白鹿洞
夜宿慈航寺。幽香印本心。一聲觀自在。萬壑海潮音。慈航寺

寺在觀音橋下泉聲洶湧如風雨驟至

山居卽事

綠陰如幄掩禪關。漫繞疏籬水一灣。石不點頭花不語。滿山猿鶴總蕭閑。

幽居夕興

烟柳一株株。幽閑入畫圖。月瑩新雨後。花墜晚風初。止水忘來去。行雲漫卷舒。
夜來高枕臥。斷夢繞菰蘆。

讀妙法蓮華經普門品感賦

明鏡生塵埃。明珠生幻翳。翳目有狂華。刮目無金鏡。我慕觀世音。妙相三十二。梵音海潮音。神通以遊戲。頻伽雅更哀。天花飛還墜。皎皎明月光。如水銀瀉地。

青谿

閑行緣青谿。谿深水縹碧。洗耳聽淙潺。澄心觀空寂。晚風生微波。水花結危石。清梵遠微微。寒山澹已夕。悠然見白雲。神人懷姑射。赤松雖未從。塵襟於此滌。

山中暮吟

輕霞明遠山。山中已云暮。野水澄寒天。朔風響枯樹。悠悠孤雲還。泠泠疏磬度。願言稅塵鞅。從容適天趣。

詠古

成連刺船去。晴山淨如沐。白雲被幽澗。疏林挂寒旭。天風與海濤。縹緲入琴曲。

孫登抱琴去。冉冉入深綠。不效嵇康懶。焉知步兵哭。惟聞鸞鳳音。妙響動山谷。

秋山

秋山自明淨。況復晚霞天。窈窕而幽深。雞犬亦翛然。巖上雲無心。邱中琴無絃。何用從赤松。水玉以乘烟。

靈隱道上

石瀨晚淺淺。疏鐘墮暝烟。雲橫山合杳。風急葉迴旋。綿邈詩中畫。高寒劫外天。時聞清梵發。來自翠微邊。

山居秋暝

端居愛清秋。秋深晚霞綺。放懷水石間。經行烟樹裏。寒山翠萬重。暮雲碧千里。簌簌萬籟鳴。裊裊孤烟起。疏鐘時一聲。落葉紛無已。歸鳥噪林端。暝色來簷底。既愜寂寥心。忽契清淨理。天風一以吹。明月明如洗。

居梨里三日留贈亞子

五噫何處覓梁鴻。難得清樽日日同。金石交論千里外。風雲氣鬱萬山中。迷陽
卻曲人間世。錯節盤根澗底松。尙有彌天宏願在。未須海內許詞宗。

少年

少年豪氣盡沈霾。哀樂中年漸欲來。寥落一鐙容獨嘯。卷舒萬劫此靈臺。得成
仗馬原天幸。爲語羣鷗莫浪猜。昨夜夢聽金縷曲。曉來猶自不勝哀。

夢中作

廬山再遊罷。曾無一字詩。桃花千萬朵。明媚夕陽時。

游植物園憶徐鑑先

圓澈心精裏十方。不將生死域微茫。高秋遠笛山陽路。挂劍歸來落照黃。

病榻漫憶

悟澈如如理。先生亦大哉。祥金終躍冶。明鏡本非臺。鐵塔人何處。龍華會未來。更誰宏大法。兩部演金胎。先師德化桂伯華先生

象教凌夷久。歸然此獨存。一燈傳石埭。千載接慈恩。皎皎程門雪。勞勞客路魂。何時陪杖履。笑語一相溫。本師宜黃歐陽竟無先生

長者給孤獨。於今又此君。揮金能惠捨。宏法最精勤。秋海澄明月。春空蔚曉雲。天南何處所。鸞鶴倘相聞。雲南雲龍王竹村先生

與我同門者。姚君及呂君。蟲沙從歷劫。鸞鶴自爲羣。繕性青蓮界。覃思貝葉文。嗟予獨飄泊。離思正紛紛。鹽城妙明丹陽秋逸

苦憶河東柳。飄然冰玉姿。夢魂游俠傳。身世杜陵詩。寥落銜杯處。蒼茫說劍時。如何天下士。憔悴海之湄。老友吳江柳棄疾亞子

滄海

滄海何緣泛一漚。漚來漚去復何求。漫云浮世身如寄。只恐鸞輪死不休。今古
早知同日暮。苑枯原不繫春秋。釋迦老子栖皇極。高坐端詳四大洲。

再遊廬山日暮自三疊泉歸作

偶沿樵徑去。信步入雲深。採藥歸來晚。蕭蕭月滿襟。

普陀禮觀音

平生最愛空王法。更慕慈航觀世音。此日遠來瞻妙相。何年歸去證初心。寂光
灑灑青蓮界。寒籟蕭蕭紫竹林。且欲遍尋無價寶。莊嚴佛國海天陰。

浮海

浮海年來亦甚都。勞生那復計榮枯。兼旬小病春將老。萬里家書錦不如。去住
元知皆幻影。蒼茫何處覓歸途。最憐身世同雞肋。值得當門一嚼無。

庭外櫻花一株一夕落盡淒然賦此

都道櫻花艷。櫻花亦可憐。淒紅無限恨。愁黛有餘妍。雨膩風香日。桃夭杏嫁天。如何春夢短。零落百花先。

和太虛法師登翠微亭飛來峯頂原韻

探勝寧辭杖。杖尋衝寒曉。入翠微深。高峯靜似修空觀。初日紅如發。大心顧盼。始知低嶺巘。栖皇剩欲老雲林。何當遍種菩提樹。跌坐間聽萬籟吟。

出靈隱山門仰望飛來峯賦呈太虛法師

驚嶺聽完午夜鐘。飛來此地作靈峯。披雲遙峙諸山外。妙相常呈翠靄中。古洞幽深供壁觀。蒼巖合沓託孤筇。高寒久絕游人跡。聚石呼猿試感通。

寄靈隱却非禪師

大師了悟似佛印。愧我魯鈍非東坡。亦欲結茅湖上住。雲林深處翠微多。

論佛學絕句七首

璧月照松寮。夜色淨如水。靜坐讀瑜伽。悠然契深旨。中觀與瑜伽。大乘之雙柱。論藏千萬言。都由此綺互。大哉金剛乘。乘義何微妙。密嚴天外天。誰與共憑眺。華嚴是寶藏。中有寶纍纍。讀此能大雄。大力大慈悲。

靜夜讀華嚴至十金剛心感賦

淨土出唯識。線索殊可尋。欲知往生理。三界唯一心。

淨土一宗理出唯識行出真言

禪宗出三論。亦自有線索。煌煌大般若。微妙超言說。宗門吾能說。說便落言詮。待訪維摩詰。同參沒字禪。

二十年夏在京試闈中作示似村淮琛鑄陳諸兄

久羸文運此重開。幕府搜羅到散材。竟月蟄居疑隔世。深宵兀坐苦量才。長羈塵海寧吾願。偶閱金經輒自哀。白菡菖香湖水綠。西冷時入夢中來。

偶感寫俟出闈時寄太虛法師

漫拋梵夾入塵中。寥落寒山一杵鐘。道力未全魔易嬈。詩心久澹句都庸。兼程奔軼悲瘖馬。萬劫飄零類斷蓬。苦憶遠行釋師子。此行行色太匆匆。

鑄陳出素縑索書爲題一絕

才人成佛在人先。康樂流風今尙傳。十日棘闈霖雨裏。論文倦後更談禪。

金波羅華集

宏場佛
化之唯
一刊物

佛學半月刊

月出兩冊
全年連郵
費價五角

本刊自發行以來，屈指三年，銷行全國，常在數萬；主編之士，多佛學鉅子。實為全國佛學刊物內容最佳，銷行最廣者。舉其優點，約有數端：

發行所

上海膠州路
新門牌念號

佛學書局及各分局或代理處

一論說欄

以淺顯通俗文字，闡精深微妙學理；使初機學人，能讀能解。

二消息欄

採集全國重要佛教新聞，逐期登載，俾各界人士，明了全國佛教情形。

三出版欄

將各處新出佛書，介紹讀者，俾便採購。

四佛學答問欄

讀者函問佛學疑難，由范古農老居士逐件詳答。

五醫藥顧問欄

各界函問疑難病症，由名醫丁福保老居士負責代答，並指示應服何藥，及如何調養方法。

其餘細目，不及備述。故定閱本刊有下列之利益：

- 1 可以增進佛學知識
- 2 可以明了佛教情形
- 3 可以明出版界情形
- 4 可以增進醫學知識
- 5 解決各種疑難病症

夫諸佛說法，原為醫治衆生心身二病。本刊宗旨，即在於斯。倘承惠購，無任歡迎！

悉曇入門

全一冊 定價八角

如來說法。以文字詮其實相。真言念誦。尤以聲音爲主要。佛經來自竺乾。譯爲漢語。雖微言大義。一一流通。而各經咒語。咸在不繙之科。持誦者深以爲苦事焉。悉曇者。天竺文字。而聲明藏之總名也。密林大師。精研密部。兼通梵文。編著是書。以爲國人學梵文者之嚮導。而志研密部。欲悉各經咒真實之聲音。以及五輪布字之法。四種曼荼之義。則尤當以是編爲入門必備之課本焉。

上海佛學書局印行

金剛頂發菩提心論淺略釋

全 一 冊

中華民國二十二年十月初版

◎每冊定價大洋叁角

(外埠酌加郵匯費)

著述人 黃懺華居士

發行人 佛學書局有限公司
代表 沈彬翰

出版者 上海佛學書局
膠州路二十號
電話三五五二四

印刷者 國光印書局
上海南成都路新大沽路西首

發行處 佛學書局
(一)上海滬西：麥特赫司脫路
(二)上海開北：新民路國慶路
(三)上海中區：望平街有正書局
(四)湖南長沙：玉泉街七十號

分銷處 外埠佛學書局
佛經流通處

上海图书馆藏书



A541 212 0021 7295B

